



UNIVERSITÄTS-
BIBLIOTHEK
PADERBORN

Universitätsbibliothek Paderborn

Explanatio In Psalmos


Complectens Psalmos à 126 ad 150

Bellarmino, Roberto Francesco Romolo <Heiliger>

Dusseldorpii, 1765


VD18 15558428-001

[urn:nbn:de:hbz:466:1-53443](#)



TH 3172





PSALMUS CXXVI.

Titulus, & argumentum: *Canticum graduum Salomonis.*

Psalmus et si obscurissimus sit; probabilius tamen videtur esse expositio græcorum S. S. Chrys. Theodore. Euthym., quod nempe pertineat hæc prophetica exhortatio, sive admonitio ad populum Hebræorum post redditum è captivitate Babylonicâ, dum laborabant in ædificandâ domo Dei, & restaurandâ urbe Jerusalem, & à vicinis gentibus toto ferè illo tempore vexabatur, & impeditabatur. Congruit titulus, qui Salomoni tribuitur: nam ipse prior ædificavit domum Domini, & civitatem Jerusalem amplificavit, & multis bonis replevit. Ipse igitur commode introducitur, qui admoneat Zorobabelem, qui fuit quasi alter Salomon, quomodo se gere rebeat in domo, & civitate reædificandâ, custodiendâ, & amplificandâ.

Altiore sensu verus Salomon, b. e. pacifcus, Christus, qui est pax nostra, juxta Apostolum, admonet eos, qui ad veram pacem aspirant, & aspirando ascendunt de valle lacrimarum ad visionem pacis, Jeru-

A 2 salem

salem Cælestem, quomodo debeant ædificare, & custodire domum, sive civitatem Ecclesiæ: tum etiam unusquisque sibi per bona opera domum ædificare in Cælo, eamque custodire, ut ad eam suo tempore feli-citer inhabitandam, perpetuóque possiden-dam ascendat.

V. 1. *Nisi Dominus ædificaverit do-mum, in vanum laboraverunt, qui ædifi-cant eam.*

Hæc dicuntur Judæis ædificantibus templum, dum infeliciter opus procede-bat, impudentibus vicinis gentibus, **I.** Esdr., monentürque, ut non solùm ma-nibus operentur, sed etiam corde, & ore Deum invocent, & in ejus adjutorio præ-cipuè fidant. Idem dictum sit anima-rum Curatoribus, & cuivis pro salute suâ æternâ laboranti.

V. 2. *Nisi Dominus custodierit civita-tem, frustra vigilat, qui custodit eam.*

Urbs Jerusalem non tantum reædifi-canda, sed simul custodienda, erat, **2.** Esdr.: nam gentes vicinæ non solùm im-pedire conabantur ædificationem, sed & demoliri, quod erat ædificatum: & ideo filii Israel unâ manu gladium tenebant, alterâ

alterâ faciebant opus; & multi eorum dispositi ad custodiendum, perpetuas agebant excubias. Sed nihilominus tot vigiliis suis nihil profecissent, nisi Dominus civitatem custodire voluisset.

¶. 3. *Vanum est vobis ante lucem surgere: surgite postquam federitis, qui manducatis panem doloris.*

Alloquitur filios Israel, qui præ nimia sollicitudine ante lucem opus ædificationis aggrediebantur. *Vanum est vobis ante lucem surgere ad opus ædificationis, nisi scilicet Dominus ædificaverit domum, vel custodierit civitatem, & ideo confidentes in Domino, & illum assiduè invocantes, post nocturnam, ac necessariam quietem surgite ad opus, qui in angustiâ, & oppressione jam vivitis ob infestationem continuam inimicorum.* Sensu altiori: Vos Præpositi Ecclesiæ, & singuli fideles, *Vanum vobis est ante lucem surgere & totum tempus consumere in ædificatione, vel custodiâ domûs aut communis, aut particularis: Surgite ad opus, postquam federitis* vacantes quieti contemplationis, & orationis, qui præ desiderio patriæ Cœlestis assiduè gemitis: *Fuerunt mihi la-*

crimæ panes die, ac nocte, dum dicitur mihi quotidie, ubi est Deus tuus?

¶. 4. *Cum dederit dilectis suis somnum, ecce hæreditas Domini, filii; merces, fructus ventris.*

Post admonitionem addit consolacionem, prædicens, fore, ut post præsentes tribulationes det Dominus pacem, & quietem populo suo, & tunc filios Israel manifestè futuros Dei hæreditatem, & potentissimos, atque fortissimos, ut nullos deinceps hostes passuri sint. Altiori sensu: cum post varios labores, & certamina dederit Deus omnibus *dilectis suis*, tam Præpositis Ecclesiæ ædificatoribus, quam privatis fidelibus domum sibi per bona opera ædificantibus, *somnum bonæ mortis*, tunc apparebit in die judicij, quod dilecti transibunt in æternam Dei possessionem, & hæreditatem: & iidem filii erunt merces Christi, qui est *fructus ventris*, quia salus electorum est Christi merces: ipse est enim, qui gratiam, & gloriam electis suis patiendo, & moriendo promeruit.

¶. 5. *Sicut sagittæ in manu potentis, ita filii excusorum.*

Decla-

Declarat potentiam filiorum Christi,
qui sunt ejus hæreditas, & merces, ac
dicit fore potentissimos, quales sunt sagit-
tæ in manu viri robustissimi, quæ maxi-
mo impetu jaciuntur, & omnia perrum-
punt. Loquitur autem de spirituali po-
tentia servorum Christi, quæ non minùs
cernitur in actione, quam in passione:
nam cùm instar tonitruj, & fulguris ter-
refaciunt, & convertunt infideles ad fi-
dem, vel peccatores ad pœnitentiam ef-
ficaciâ prædicationis, splendore sanctita-
tis, miraculorum virtute; & quando tor-
menta omnium generum incredibili pa-
tientia, & fortitudine ad mortem usque
decertantes pro fide, & pietate tolerant,
quid sunt aliud, nisi sagittæ in manu po-
tentis? Sed cur filii isti tam fortes dicun-
tur filii excusorum? Quia filii sunt ho-
minum ejectorum, & expulsorum à
Mundo, quasi quisquilliæ, & rejectamen-
ta; nempe filii Prophetarum, & Aposto-
lorum. De Prophetis lege *ad Hebr. C.*
11. à v. 36.; de Apostolis i. Cor. 4. à v. 9.
Et tamen isti ita excussi, & rejecti, fortis-
simi fuerunt, & de Mundo, & de Dæ-
monibus mirabiliter triumpharunt. Ho-

rum filii sunt omnes electi, qui sicut sagittæ in manu potentis hostes vulnerârunt, & vicerunt.

X. 6. *Beatus vir, qui implevit desiderium suum ex ipsis; non confundetur, cum loquetur inimicis suis in porta.*

Concludit per Epiphonema acclamando ipsi Domino Christo. Verè felix est ille Christus, quia perduxit ad finem desiderium suum, quod erat videnti salutem, & gloriam filiorum suorum, pro quibus tam multa fecit, & pertulit: & ideo in ultimo judicio, quod exercabitur in amplissimâ portâ, h.e. in conventu totius Mundi, non confundetur, cum loquetur inimicis suis Dæmonibus, & hominibus iniquis, sed eos potius confunderet, & convincet injustitiæ in perseguendo Ecclesiam.

PSALMUS CXXVII.

Titulus: *Canticum graduum.*

Argumentum est exhortatio ad pietatem propositâ ingenti mercede Virtutis.

X. 1. *Beati omnes, qui timent Dominum, qui ambulant in viis ejus.*

Docet

Docet redeuntes à captivitate, quomodo se gerere debeant, si nolint iterum in captivitatem reverti, sed semper frui bonis Jerusalem. Doctrina etiam pertinet ad peregrinantes à patriâ Cælesti, & ad eam redire festinantes. *Omnes omnino, nullo excepto, tunc solum verè erunt beati*, h. e. fortunati, hilares, contenti, si Deum offendere formidaverint, & eo timore muniti, à Dei gratiâ, quæ fons est omnium bonorum, nunquam exciderint. Signum autem sancti hujus timoris est, si in præceptis ejus ambularint.

¶. 2. *Labores manuum tuarum quia manducabis, beatus es, & bene tibi erit.*

Primam felicitatem communem Hebræis, & Christianis ponit, non in magnis divitiis, sed in eo, quod fruantur iis bonis, quæ justo labore manuum acquisierint. Verum cum contingat, justos spoliari bonis, esurire &c., sensus altior erit: nunc *manducabis laborem*, h. e. de gaudio laboris, & tribulationis reficeris; postea verò de fructu ipso laboris, h. e. de præmio bonorum operum saginaberis; & ideo nunc *beatus es in spe, & postea bene tibi erit in re.*

¶. 3. Uxor tua sicut vitis abundans in lateribus domus tuæ.

Altera felicitas timentis Deum est, quod si forte uxorem ducere voluerit, unam tantum ducet, eamque non ad libidinem explendam, sed ad filiorum procreationem. Vide *Tob. C. 6.* à ¶. 18. & *C. 8. ¶. 9. Uxor tua*, non uxores, non concubinæ tuæ, *sicut vitis abundans*, h.e. multos pariens filios, ut vitis fœcunda multos racemos, *in lateribus domus tuæ*, h.e. intus manens, ut modesta, & pudica, & curam domus interioris habens, dum vir de his, quae foris sunt, cogitat. Altiori sensu promittitur fœcunditas spiritualis: nam viri Sancti non solùm patres, sed etiam matres sunt eorum, quos ad fidem, vel pœnitentiam convertunt: patres sunt prædicando verbo, vel exemplo; & matres gémendo pro eis, & orando.

¶. 4. Filii tui sicut novellæ olivarum in circuitu mensæ tuæ.

Tertia felicitas est educatio filiorum: viri enim timentes Deum, & ambulantes in viis ejus non tantum filios multos, sed etiam bonos, & bene moratos habebunt, quos

quos ab infantia docebunt timere Deum,
& ambulare in viis ejus. *Fili tui similes erunt arbusculis optimis, quales sunt oleæ, quæ semper virent, & fructum dulcissimum faciunt; non autem similes erunt rubis, aut spinis, aut sterilibus plantis.* Erunt autem *in circuitu mensæ tuæ*, ut eos omnes simul videns, & cum eis convivens, & convescens, majorem ex illis delectationem capias. Quæ omnia convenient etiam in filios spirituales, quos cum pater Verbo Dei pascit, & proficere videt, mirificè gaudet, & cum Apostolo dicit: *Gaudium meum, & corona mea, sic stet in Domino charissimi, Philipp. 4.*

X. 5. Ecce sic benedicetur homo, qui timet Dominum.


X. 6. Benedicat tibi Dominus ex Sion, & videoas bona Jerusalem omnibus diebus vitæ tuæ.

X. 7. Et videoas filios filiorum tuorum, pacem super Israel.

Quanta felicitas timentis Deum est, quod ita sit à Deo, qui habitat in Sion, benedicendus, ut videat civitatem suam Jerusalem abundantem omnibus bonis, toto

toto tempore vitæ suæ; & videat in eâ civitate filios filiorum similiter beatos, & felices, & denique pacem, quæ omnia bona conservat, & custodit, stabilem videat super populum Israel. Altiori sensu describitur major felicitas, nempe æterna: *Ecce, præter omnia, quæ dicta sunt, sic benedicetur homo, qui timet Dominum, nimirum dicetur illi: Benedicat tibi Dominus, non solùm de terra, temporalia bona tribuens, sed etiam ex monte sancto suo, ex altissimo habitaculo suo, tibique præstet, ut Deum, in quo sunt omnia bona Jerusalem, videas in æternum.* Accedet ad gaudium beatorum, quòd non solùm visuri sint filios, quos ipsi genuerunt per se Deo, sed & qui per filios spirituales, & per filios filiorum, usque ad consummationem sæculi, ad Deum adducti fuerint; de quibus omnibus, tanquam de propriis, & ad se pertinentibus gaudebunt. Demum accedet ad cumulum felicitatis, quòd, inimicis omnibus in gehennam detrusis, videbunt pacem firmam, & stabilem, quæ securissimos reddet omnes habitatores Jerusalem usque in æternum.

PSAL-



PSALMUS CXXVIII.

Titulus, & Argumentum: *Canticum graduum.*

In Psalmis gradualibus vicissim Propheta nunc deplorat ærumnas peregrinationis, nunc bona patriæ Cœlestis laudat, ut tam illæ, quam ista ad ascendendum, & festinandum hortentur. Quoniam igitur in præcedenti Psalmo multa dixit de bonis Ierusalem; nunc redit ad mala Babylonis, in quâ exules sumus, & peregrini.

V. 1. Sæpe expugnaverunt me à juventute meâ, dicat nunc Israel.

Consolatur se populus Dei in tribulatione positus, quod jam sit assuetus talibus angustiis, & semper, Deo adjuvante, liberatus fuerit. Conveniunt hæc verba Judæis, qui in reædificatione templi, & urbis à vicinis gentibus oppugnabantur; item Ecclesiæ Christi, quæ vix unquam ab oppugnatione Paganorum, vel Hæreticorum, vel falsorum Christianorum respirare potuit. Ait igitur: Populus Dei, qui *Israel* vocatur, non miretur, si ab hostibus oppugnatur, quia nihil novi patitur, sed revocet ad memoriam

riam præteritas angustias, & dicat, sæpe expugnaverunt, h. e. oppugnaverunt me inimici mei jam inde à primâ meâ ætate: nam vix nata Ecclesia passa est in Abele persecutionem Caini, ac deinde plurima.

¶. 2. Sæpe expugnaverunt me à juventute mea, etenim non potuerunt mihi.

Dat rationem, cur populus Dei toties ab hostibus sit oppugnatus, nempe quia nunquam prævaluerunt. Non potuerunt mihi nocere, vel prævalere. Verissimum hoc esse Ecclesiastica historia testatur.

¶. 3. Supra dorsum meum fabricaverunt peccatores, prolongaverunt iniquitatem suam.

Idem repetit, sed metaphoricè. Supra dorsum meum artem fabrilem exercerunt, utentes dorso meo pro incude. Porro prolongatio iniuritatis est continua-
tio persecutionis.

¶. 4. Dominus justus concidet cervices peccatorum: confundantur, & convertantur retrorsum omnes, qui oderunt Sion.

Consolatur populum Dei spe propinquæ liberationis. Bono animo esto te justi: nam persecutores vestri quidem injustè

injustè dorsum, seu cervicem vestram nunc premunt; sed paulò pòst *Dominus justus* justè cervices ipsorum non premet, sed concidet, & in frusta comminuet gladio suo, ut nunquam amplius vobis nocere possint: & tunc demum confundentur, qui antea superbè exultabant, & convertentur retrorsum fugientes, cadentes omnes illi, qui oderunt, & persequebantur populum Dei. Sic concisi sunt à Deo Pharao, Nabuchodonosor, Balthasar, Antiochus, Nero &c. &c.

¶. 5. *Fiant sicut fænum tectorum, quod priusquam evellatur, exaruit.*

¶. 6. *De quo non implebit manum suam, qui metit, & sinum suum, qui manipulos colligit.*

Alia est imprecatio, pariter prædictiōnem notans: Significat enim brevissimam fore persecutorum felicitatem. Hanc comparat cum fæno, sed ne quidein cum campestri, sed cum eo, quod in tectis domorum nascitur, quæ est herba minutissima, & nullius pretii, nullique usui apta; quam idcirco nemo metit, nec in manipulos redigit, sed arescere, & perire permittit. In die judicii

vide-

videbimus, viros quondam potentissimos, & ditissimos, qui se domos suas regnis, & imperiis stabilivisse crediderant, abjectos projici in locum totius Mundi infimum; & qui deliciis, & voluptatibus assueti, ne levissimum quidem incommodum ferre poterant, sempiternis cruciatibus addici sine illâ consolatione.

*V. 7. Et non dixerunt, qui præteribant,
Benedictio Domini super vos: benediximus
vobis in nomine Domini.*

Quia dixerat, fœnum tectorum non solere meti, & colligi, addit, non futurum etiam, ut messoribus ejus à prætereuntibus benedicatur, quomodo benedicti solet messoribus tritici, vel fœni campestris, quod pertinet ad majorem confusionem iniquorum, qui fœuo nascenti in tectis comparati sunt. Dicit ergo: Non contigit vobis, nec contingit, ut, qui transeunt per vias, benedicant iis, qui vos metunt: nulli enim vos metent, sed qui tecta purgant, projicient vos in ignem, vel in cloacam. Porrò benedictio prætereuntium non ad messores tantum, sed ipsam etiam messem pertinet: precantur enim prætereuntes, ut copiosa, & matura

matura sit messis. Sic carentia benedictionis redundabit in ipsos impios, quibus non dicetur: *Benedictio Domini super vos*; nec dicetur: *Benediximus vobis in nomine Domini*; sed à Christo dicetur: *Ite maledicti in ignem æternum.*

PSALMUS CXXIX.

Titulus, & Argumentum: *Canticum graduum.*

Hic Psalmus est unus ex gradualibus, quia deplorat miseriam exilii; unus est etiam ex pænitentialibus, quia docet rationem agendi veram pænitentiam. Pro defunctis quoque recitari solet in Ecclesiâ frequentissimè, quia si dicatur in personâ animæ in purgatorio detentæ, omnia optimè quadrant: nam & animæ illæ sunt in quodam profundo, & ascendere cupiunt, & exspectant misericordiam Dei per Redemptoris nostri pretium. In summâ tria continent, orationem ad Deum, exhortationem ad populum, & prædictionem redemptionis futuræ.

X. I. *De profundis clamavi ad te Domine: Domine exaudi vocem meam.*

B

Ora-

Oraturus Deum, hoc, & sequenti
 ¶. petit audientiam. Incipit à similitu-
 dine hominis jacentis in imâ valle, vel
 in profundo puteo, qui ut audiatur ab
 iis, qui sunt in altissimo monte, mag-
 nâ voce clamare debet: quæ similitudo
 aptissima est; nam licet Deus sit ubique,
 tamen ratione dissimilitudinis peccator
 longissimè distat à Deo: Deus semper
 justus, & beatus, & in altis habitat;
 peccator semper malus, & miser, &
 similis Jonæ, qui cum Deo noluisset
 obedire, dejectus fuit in profundum
 maris, immò in profundum ventrem ce-
 ri, unde tamen clamans exauditus est à
 Deo. Non ait David de *profundo*, sed
 de *profundis*, duobus scilicet: nam ve-
 rus pœnitens clamare debet ex profun-
 do miseriæ, velut ex valle lacrimarum,
 aut luto fæcis; & ex profundo cordis,
 seu intimâ cognitione propriæ miseriæ.

¶. 2. Fiant aures tuæ intendentæ in
 vocem deprecationis meæ.

Non sufficit, ut quis magnâ voce
 clamet, sed, ut audiatur, requiritur,
 ut is, ad quem clamatur, attendat.
 Deus etsi omnia videat, audiat; si tamen
 non

non facit, quod petimus, quasi alia cogitans, non attenderet ad vocem orantis: ideo David omnino audiri cupiens, non contentus magnâ voce clamasse, rogar^t Deum, ut dignetur attendere, h. e. admittere preces, & donare, quod petitur.

V. 3. *Si iniquitates observaveris Domine, Domine quis sustinebit?*

Captatâ audienciam, exponit petitio-
nem suam, non nimis audacter, sed
cum aliquâ convenienti ratione involu-
tam. *Domine si iniquitates hominum ob-
servare volueris, omnes condemnabis;*
quod cùm non deceat infinitam bonita-
tem tuam, peto, ut peccata mea mihi
condones, & de hoc profundo eruas,
in quod me iniquitas sola demersit.

V. 4. *Quia apud te propitiatio est: propter legem tuam sustinui te Domine.*

Vera pœnitentia duo requirit, cogni-
tionem propriæ miseriæ, sínè quâ me-
dicina non quæritur, nec agitur pœni-
tentia; dein cognitionem misericordiæ
Divinæ, sínè quâ cognitione desperatur
venia, & pœnitentia inutilis agitur. V. 1.
2. & 3. ostendit se planè cognoscere

B 2 pro-

nti
u-
el
ab
g-
do
ue,
tor
per
rat;
&
sset
um
ce-
st à
sed
ve-
un-
im,
dis,
riæ.
s in
oce
ur,
dat,
nen
a

propriam miseriam; jam ostendit se nosse etiam misericordiam Dei maximam. Ait ergo: Licet nemo subsistere possit, si observare velis iniquitates nostras: ego tamen quia novi te ex naturâ misericordem esse, & scio, apud te inveniri propitiationem; & quia tu legem posuisti tibi, ut cum impoenitentibus severissimè te geras, cum pœnitentibus misericorditer, & suaviter, ideo propter *banc legem tuam sustinui te Domine*, sperans, & exspectans indulgentiam peccatorum.

XV. 5. Sustinuit anima mea in verbo ejus: speravit anima mea in Domino.

Quod ego facio, omnis populus Dei faciat, nempe speret in Domino, cùm in quocunque profundo fuerit: sive peccatis, sive peccatorum pœnis prematur; in Dei adjutorio confidat totâ die à primo manè usque ad noctem. Veteres dividebant noctem in quatuor partes, quarum quælibet continebat tres horas; & dicebantur custodiæ, seu vigiliæ, quia vigiles urbium, castrorum tribus horis vigilando custodiebant urbem, castra, ac tum tradebant alteri officiæ.

officium vigilandi, & custodiendi. *Custodia igitur matutina est tempus à noctis horâ nonâ (prima noctis hora erat nostra hora sexta vespertina præcedentis diei) usque ad ortum Solis.*

¶. 7. *Quia apud Dominum misericordia, & copiosa apud eum redemptio.*

Dat rationem, cur oporteat semper in Deo confidere, & simul prædicit redemtionem generis humani, quæ futura erat per JESUM Christum D. N. Porrò redemptio *apud Deum* erat, non *apud hominem*, qui quidem se peccando vendere, & à Deo Diabolo subjici poterat; redimere tamen, & justitiæ divinæ satisfacere non poterat. Redemptio fuit *copiosa*, quia non tantum redimimur à captivitate, sed & evehimur ad hæreditatem Regni Cælestis.

¶. 8. *Et ipse redimet Israel ex omnibus iniquitatibus ejus.*

Redemptio, quæ erat *apud Deum*, tum planè manifestabitur, cum redimeatur populus Dei, non, ut Judæi carnales exspectant, à potestate Regum temporaliū, sed *ab omnibus iniquitatibus suis*. Quæ redemptio jam inchoata, perfec-

Etissimè complebitur in die judicii, cùm liberabimur à peccatis, & à pœnis omnibus peccatorum, & à periculo deinceps peccandi.

PSALMUS CXXX.

Titulus, & argumentum: *Canticum graduum.*

David palam enuntiat humilitatis suæ virtutem, non ut se jacleret, sed ut ostendat, se, licet robore, potestate, sapientia, & opibus omnibus hominibus sui temporis in Palæstinâ excelleret, tamen non in suis viribus fiduciam unquam posuisse, & ideo debere omnes alios, ad ipsius exemplum, in solo Deo sperare, ut ait x. 5. Psalmus est ex gradualibus unus, quia docet, in quo humilitas vera consistat, & nulla est via securior ad ascendendum humiliatae, dicens Domino: omnis, qui se humiliat, exaltabitur.

V. 1. *Domine non est exaltatum cor meum, neque elati sunt oculi mei.*

Securus Propheta, quod vera dicturus esset, Deum ipsum alloquitur, quem nemo fallere potest. Dicit autem coram

ram Deo, se vitio superbiæ nunquam fuisse obnoxium, sive cor internum, sive signa oculorum externa considerentur. Multi superbi in corde suo, extrinsecus humilitatem simulant. Multi & supercilios elato, & corde tumido proximos suos contemnunt. David ut erat humilis corde, sic humilitatem oculis præferebat.

X. 2. *Neque ambulavi in magnis, neque in mirabilibus super me.*

Dixit de superbiâ cordis, & oculorum; nunc addit de superbiâ verborum, & operum. Aliqui jaētant, se posse facere, vel fecisse, vel esse facturos majora, & mirabilia, quām revera possint; imò aliqui præsumunt aggredi, quæ superant vires; primi ambulant, sive ascendunt super se verbis, secundi etiam factis: David in verâ humilitate fundatus ait, ab utroque se abstinuisse.

X. 3. *Si non humiliter sentiebam, sed exaltavi animam meam.*

X. 4. *Sicut ablactatus est super matre sua: ita retributio in anima mea.*

Non contentus Propheta, ipsi Deo, qui corda scrutatur, dixisse, se ab omni

superbiâ semper abhorruisse, id ipsum confirmat juramento execratorio, ut tantò major fides ipsius verbis ab omnibus habeatur. Dicit igitur: *Si non humiliiter sentiebam de me ipso, sed exaltavi animam meam; sicut infans recens ablatatus manet in sinu, vel super genua matris suæ, mœstus, & plorans, quia privatus est dulcedine lactis, quæ pro illo tempore summæ deliciæ ipsius erant: sic anima mea privetur dulcedine consolationis Divinæ, quæ meæ potissimæ, ac solæ deliciæ sunt.* Quantum sit hoc supplicium, quod sibi Propheta sanctissimus imprecatur, soli intelligunt, qui eodem spiritu repleti gustaverunt, quād dulcis sit Deus.

X. 5. Speret Israel in Domino, ex hoc nunc, & usque in sæculum.

Ex hâc Psalmi conclusione intelligi potest, quò tendat illa humilitatis prædicatio: non enim vir verè humilis propositum habuit se laudandi, sed hortandi populum suum ad spem omnem in solo Deo collocandam. *Speret Israel &c.* Si ego Rex, & Propheta, non me efferre audeo propter potentiam, & sapientiam,

entiam, neque de me ipse præsumo,
sed omnem spem meam in Deo collo-
catam habeo; certè par est, ut populus
meus Israel, qui etiam populus Dei est,
non se existimet aliquid esse, cùm nihil
sit; neque in viribus suis confidat, sed
speret in Domino, & non hodie solum,
aut cras, sed omni tempore speret.

PSALMUS CXXXI.

Titulus, & argumentum: *Canticum
graduum.*

Psalmum hunc vel Salomon composuit,
cùm, ædificato templo, intulit Arcam Do-
mini in locum ei præparatum; vel certè
compositum à Davide, sibique datum ad
concinendum post templi ædificationem Sa-
lonon cecinit: id patet ex fine C. 6. L. 2.
Paralip., tum ex totâ serie hujus Psalmi,
ac præcipue ex v. 10. Continet Psalmus
ad literam primò ardentissimum desiderium
Davidis ædificandi templum; Secundò peti-
tionem ad Deum, ut stabiliatur Regnum,
in domo David, ut sanctificantur ministri
Domini, & alia id genus, juxta promis-
siones antea Davidi à Deo factas. Nume-

B 5

ratur

ratur hic Psalmus inter graduales . tum
quia cani debebat à populo redeunte à capti-
vitate , ut excitaretur ad imitandum desi-
derium Davidis , & diligentiam Salomonis
in templo reædificando ; tum ut admoneatur
spiritualis peregrinus , quanto fervore fla-
grare debeat , in ædificando spirituali tem-
plo tum in corde suo , tum in Cœlesti Je-
rusalem.

*X. 1. Memento Domine David , &
omnis mansuetudinis ejus.*

Orat Salomon per merita patris sui.
Vult Deus sæpe orari per merita homi-
num justorum , & sic multa concedere ,
quæ alioqui minimè concessisser. Me-
minit Salomon solius mansuetudinis ,
tum quia hæc virtus in Davide potissi-
mum eluxit , tum quia singulariter Deo
placet , & facit hominem similem Deo.
Illud , *memento* , non arguit oblivionem
in Deo ; sed significat Deum , si non mi-
seretur filiorum viri justi , ita se gerere ,
quasi oblitus esset , quid apud se vir ille
justus meruerit.

*X. 2. Sicut juravit Domino , votum
vovit Deo Jacob.*

X. 3. Si

V. 3. Si introiero in tabernaculum domus meæ, si ascendero in lectum strati mei.

V. 4. Si dedero somnum oculis meis,
Et palpebris meis dormitionem.

V. 5. Et requiem temporibus meis, donec inveniam locum Domino, tabernaculum Deo Jacob.

Exponit effectum mansuetudinis David, qui cum mitis erat, & humilis corde, indignum putabat, ut ipse haberet domum, & lectum, & Arca Dei non haberet sedem stabilem, templum scilicet, in quo honorifice permaneret. Votum, cuius hic fit mentio, colligitur L. 2. Reg. C. 7. Porro a V. 3. David inducit loquens, & sensus est: juro, me non intraturum domum meam, ita ut obliviscar domus Dei ædificandæ: *Si ascendero &c.* h. e. juro, me non ascensurum in lectum strati mei, ita ut non cogitem de loco templi, ubi propriè Arca Domini requiescat: *Si dedero &c.*, juro, me non dormiturum, nec dormitaturum, ita ut non vigilem circa templum Domini erigendum. *Et requiem &c.* juro, me non compositurum caput ad quiescendum, ita ut quiescam a sollicitudine Domus Domini

mini præparandæ. Quod juramentum,
seu votum David fidelissimè implevit.
Vide I. Paralip. C. 29. à v. 2.

v. 6. *Ecce audivimus eam in Ephrata,*
invenimus eam in campis Silvæ.

Adferr rationem, cur David optaverit templum Domino ædificare, quia Arca Domini sedem propriam, ac stabilem non habebat. Porrò cùm ea, quæ hic referuntur, ante Davidem natum contigerunt, David, vel Salomon hic non loquuntur in suâ personâ, sed in personâ populi. *Ecce audivimus à majoribus nostris, Arcam aliquando fuisse in Silo, in terrâ Ephraim; & rursum postea invenimus, & vidimus eam in campis silvæ;* non enim deerant senes, qui ejus rei meminisse poterant. *Vide I. Reg. C. 4. § 6.*

v. 7. *Introibimus in tabernaculum ejus, adorabimus in loco, ubi steterunt pedes ejus.*

Exposito voto, & desiderio patris sui Davidis, reducturus Salomon Arcam in templum à se ædificatum, ait: *Introibimus &c. haec tenus Dominus quasi hospes fuit in variis locis; sed nunc habebit*

bebit stabilem domum, & ideo nos introibimus in tabernaculum ejus jam erectum in monte Sion, & adorabimus conversi ad Arcam sanctam, quæ est scabellum, ubi steterunt, ac stare solent pedes ejus. Sanctuarium in interiore parte tabernaculi sic constructum erat, ut Arca esset quasi scabellum pedum Domini, & super Aream esset propitiatorium, quasi sedes Domini, quæ tenebatur à duobus Cherubim.

V. 8. *Surge Domine in quietem tuam, tu, & Arca sanctificationis tuæ.*

Introducturus Salomon Arcam in templum, poëtico more eum invitat, alloquens Dominum, non ut est in se, sic enim eum Cæli Cælorum non capiunt; sed ut peculiari modo erat in Arcatestamenti, quia ex illâ responsa dabat. *Surge Domine de loco, ubi haec tenus quasi hospes habitasti, & ingredere in domum tuam propriam, tu cum throno tuo, & scabello pedum tuorum, quod est Area, in qua, & per quam tu ab omnibus, qui illam sciunt, sanctificaris, & honoraris.*

V. 9. Sa-

¶. 9. *Sacerdotes tui induantur justiam, & Sancti tui exultent.*

Introducētā jam Arcā in templum, orat Salomon primō pro Sacerdotibus, deinde pro Rege, sive pro se: nam ab his dependet salus totius populi: Sacerdotes enim regunt populum in spirituālibus, & Reges in temporalibus. Pro Sacerdotibus duo petit, ut non solūm justi sint intus in corde, & animo, sed etiam exteriūs, ut in verbis, & operib⁹ nihil turpe appareat, sed justitia: deinde ut iidem Sacerdotes, qui Sancti rui propriè sunt, seu tibi ad ministrandum dedicati, exultent alacriter laudando te, & sic bene fungantur munere suo. Væ nobis miseris, qui ministerium Altissimi sortiti, tam procul absimus à fervore, quem Salomon in umbraticis Sacerdotibus exigebat.

¶. 10. *Propter David servum tuum, non avertas faciem Christi tui.*

Orat nunc Salomon pro Rege, seu pro se, & ut faciliūs impetrēt, adducit merita Patris sui David. Propter fidele obsequium, quod tibi præstīt pater meus, dum vixit, non facias, ut ego, qui

qui patris mei loco unctus sum in Regem populi tui, confusus recedam à te, rejecta prece meâ, & sic facias me avertere faciem meam à te.

¶. 11. *Juravit Dominus David veritatem, & non frustrabitur eam: de fructu ventris tui ponam super sedem tuam.*

Incipit referre promissiones factas à Deo Davidi patri suo, ut, iis narratis, facilius impetraret, quod petit. *Juravit &c.;* rem per se veram ex Dei promissione, certiorem & firmiorem reddidit juramento, & hoc juramentum non faciet irritum; scilicet dabo tibi successorem in Regno filium tuum.

¶. 12. *Si custodierint filii tui testamentum meum, & testimonia mea hæc, quæ docebo eos.*

¶. 13. *Et filii eorum usque in sæculum sedebunt super sedem tuam.*

Juramentum, & promissio sine pœnitentiâ, seu non irritanda est de uno filio, nempe de Christo, cuius Regni non erit finis; sed de aliis filiis promissio est conditionata: *Si filii tui & filii eorum usque in Sæculum, h. e. perseveranter custodient testamentum, seu fœdus Domini de non*

non habendis Diis alienis, & præcepta
mea servaverint, sedebunt super sedem
tuam, si minùs, ut factum est, pro-
jicientur.

V. 14. *Quoniam elegit Dominus Sion,
elegit eam in habitationem sibi.*

V. 15. *Hæc requies mea in sæculum sæ-
culi, hic habitabo, quoniam elegi eam.*

Possent hæc aliquo modo intelligi de
urbe Sion terrenâ, ut figura erat Eccle-
siæ Christi: elegit enim Deus urbem il-
lam pro tempore, ut esset urbs Regia,
& Sacerdotalis, ita ut ibi esset thronus
regius, & templum Domini. Sed ta-
men quia brevi diruenda erat, & ever-
tenda, Regnum ex eâ tollendum, tem-
plum incendendum, dicendum est, hæc
pertinere ad Ecclesiam Christi, & ipsa est
Jerusalem, & Sion. Dominus juravit
Davidi, se positurum, & stabiliturum fi-
lium ejus Christum super sedem ejus,
quæ est Sion, seu Ecclesia, quia elegit
eam in habitationem suam perpetuam,
& de eâ dixit: non deseram unquam
hanc Ecclesiam, sed in eâ perpetuò re-
quiescam, quia transferam eam ad per-
fectam beatitudinem in Cælis, & ibi ha-
bitabo

bitabo in eâ, quoniam firmissimo, & aeterno decreto elegi eam. Dicitur Deus requiescere, ut ait S. Aug., quando facit nos requiescere; quod fiet, si pars Ecclesiæ peregrinans in terris tandem adjungetur triumphanti in Cælis.

v. 16. *Viduam ejus benedicens benedicam, pauperes ejus saturabo panibus.*

Hic v. cum sequentibus, promittit civitati David, quæ est Sion, multa bona, quæ utcunque applicari possunt terrenæ urbi, ut figura erat Ecclesiæ, cui illa proprie, & perfectè conveniunt. Primò igitur promittit abundantiam rerum temporalium tantam (benedictio Dei in S. Scripturâ abundantiam significare solet) ut etiam viduæ, quæ solent esse maximè destitutæ, & alii pauperes satiari possint. Sed hæc abundantia in sensu altiori significat copiam cibi spiritualis, verbi Dei, & Sacramentorum, quibus abundant filii Ecclesiæ, ii præsertim, qui sunt pauperes spiritu.

v. 17. *Sacerdotes ejus induam salutari, & sancti ejus exultatione exultabunt.*

Alterum bonum sanctæ Civitatis erit, quod Sacerdotes ejus sanctitate, & justi-

C

tiâ

tiâ conspicui erunt, ut petierat Salomon
¶. 9. Faciam, ut Sacerdotes ejus in-
duantur justitiâ, quæ est salus animæ,
sicut morbus animæ est iniquitas. Et
Sancti, seu Sacerdotes ejus cum alacri-
tate Deum laudabunt.

¶. 18. *Illuc producam cornu David, pa-*
ravi lucernam Christo meo.

Tertium bonum, & quidem maxi-
mum sanctæ Sion erit, quod ibi orietur
Regnum David. *Illuc*, græcè, hebraicè
iti. Per *Cornu* metaphoricè intelligitur
potestas, & excellentia Regia: ut enim
cornu est durissimum, & elevatum; ita
Regia dignitas est potens, & superemi-
nens. Per *Cornu David* ad literam intel-
lige Regnum Messiae, quod erat inchoan-
dum in Sion, & indè per totum Mundum
propagandum. Unde hic ¶. intel-
ligi non potest de Salomone, & Regno
ejus, qui id temporis regnabat, & flore-
bat; hic autem de futuro dicitur, *Illuc*
producam, seu faciam oriri, & quasi ger-
minare cornu David: quasi aperte præ-
diceret eversionem Regni temporalis,
quod tunc vigebat, & suscitandum postea
in eadem urbe Regnum æternum Messiae.

¶. 18. 1
Illud,

Illud, *Paravi lucernam Christo meo*, dupliciter intelligi potest: primò per *lucernam* potest intelligi Messias, & per *Christum* David: Scriptura enim passim vocat *lucernam*, filium, sive posteros, nam in filiis parentes vivunt, & lucent: vide L. 3. Reg. C. 11. & 15.; & tunc sensus erit: *illic producam cornu David*, quia Davidi, *Christo meo paravi lucernam*, h. e. filium, successorēmque ejus Messiam: unde ne illud V. 11., *De fructu ventris tui ponam super sedem tuam*, carnales Judæi intelligerent de Salomone, explicatur hoc loco de Messia futuro. Secundò per *lucernam* potest intelligi S. Joannes Præcursor Domini, vide Joan. C. 5. V. 35.; & per *Christum* ipse Messias: cùm enim hic venturus erat sine opibus, & comitatu regio, non facile à Judæis exspectantibus Messiam, Regem temporalem, agnosci potuisset, nisi præcessisset Joannes, qui singulari suā sanctitate, & vitæ austeritate omnium oculos in se converteret instar lucernæ in caliginoso loco. Dicit igitur: *illic producam cornu David*, h. e. Regnum aeternum Messiae, & jam præparavi lucernam, h. e.

C 2

Præ-

Præcurforem, qui erat quasi lucerna,
Christo meo, h. e. Messia.

v. 19. *Inimicos ejus induam confusio-
ne, super ipsum autem efflorebit sanctifica-
tio mea.*

Prædictus de futuris Christi inimicis:
eos implebo ignominiam maximam. Paulus
post Christi mortem Romani Judæorum
civitatem everterunt; ipsos magnam stra-
ge affecerunt, & eorum, qui supererant,
alios vilissimo pretio vendiderunt, alios
in publicis ludis bestiis objecerunt: &
ab illo tempore gens Judæorum ubique
servit, ubique contemnitur: sed in die
novissimo non solum Judæi, sed & Pa-
gani, Hæretici, & omnes falsi fratres,
qui Christo in membris ejus inimici fue-
runt, induentur confusione. Christus
autem cum omnibus membris suis in-
duetur gloriæ: nam sanctificatio, seu
gratia, quæ in hoc Mundo erat quasi se-
men in terrâ absconditum, vertetur in
gloriam, & emittet flores incredibilis
pulchritudinis.

PSAL-

PSALMUS CXXXII.

Titulus, & argumentum: *Canticum graduum.*

Compositus videtur *Psalmus*, ut à *Judeis* caneretur, dum, post redditum à captivitate, & reædificatâ urbe, ac templo, cœperunt simul pacificè habitare, remoto schismate, quod erat ante captivitatem inter *Regnum Israel*, & *Regnum Juda*. Convenit etiam multitudini, E.g. *Cænobiis*, ubi viget concordia, & communio. Sed potissimum locum babet in *Cælesti patriâ*, ubi, finitâ peregrinatione, omnes sunt consummati in unum, *Ioan. 17.*, & ubi Deus est omnia in omnibus, *i. Cor. 15.*

¶. i. Ecce quām bonum, & quām jucundum habitare fratres in unum.

Vox est eorum, qui jam experiri cœperunt utilitatem, & gustare dulcedinem perfectæ charitatis; quæ duo bona in concordiâ, & pace fratrum simul habitantium conjunguntur. Utilitas in eo est, quod virtus unita sit major, fortior, & melius, ac facilius, conservatur: jucunditas in eo, quod per charitatem multi sint cor unum, & anima una; unde

C 3 qui-

quilibet gaudet de bono aliorum non minus, quam de suo.

¶. 2. *Sicut unguentum in capite, quod descendit in barbam, barbam Aaron.*

¶. 3. *Quod descendit in oram vestimenti ejus: sicut ros Hermon, qui descendit in montem Sion.*

Jucunditatem habitantium in unum comparat unguento pretioso, & non cuicunque unguento, sed illi, quod descendit in barbam Aaronis, seu quo ungebatur caput summi Pontificis in consecratione, quod erat odoris suavissimi, *Exod. 30.* Per oram vestis intellige summitatem ejus, ut patet ex hebraico, & græco. Sensus est: sicut unguentum non communicatur à capite aut barbæ abscissæ, aut vesti in arcâ sepositæ, sed iis velut partibus corpori unitis, & applicatis: Sic nisi fratres habitent in unum, h. e. charitate conjuncti, dona cælestia à capite Christo defluentia non descendenterent in barbam, h. e. in Prælatos, neque à barbâ in vestimenta, h. e. in reliquum populum.

Deinde utilitatem habitantium in unum comparat rori; neque enim mon-

tes

tes ex rore jucunditatem, sed utilitatem percipiunt. Quomodo autem ros montis Hermon, qui longè distat à Sion, descendat in montem Sion, variis modis exponunt Interpretes. Putat Em. Bellarminus Prophetam considerasse, montem Hermon esse altissimum, & amplissimum, atque in eo magnam esse roris abundantiam: montes (Hebræus legit in plurali) Sion esse multò humiliores, & aridiores: & ideo more pœtico dixisse, ex monte Hermon descendere rorem in montes Sion, quasi ille rorem, quo abundat, his, qui eo carent, communicaret; non quod idem omnino ros, sed similis ex Hermon in Sion descendere videatur. Similitudo aptissima est: sunt enim fratres concordes, quasi tot montes, seu colles Sion, in quos descendit ros Cœlestis à Christo, qui est quasi Hermon altissimus, & rore Cœlesti plenissimus: unde ait Joannes C. I., *Et de plenitudine ejus omnes accepimus.* Non communicat autem Christus nobiscum eam ipsam gratiam, & gloriam numero, quam in se habet, sed aliam similem, & minorem.

X. 4. Quoniam illic mandavit Dominus benedictionem, & vitam usque in sæculum.

Ratio, cur tantis bonis abundet cœtus fratrum concorditer viventium: quia Deo gratissima est concordia, & charitas fraterna, ideo illic mandavit benedictionem, h. e. eam replet copiâ bonorum omnium, idque non ad breve tempus, sed in æternum: nam ideo cum benedictione misit ad eos vitam usque in sæculum; quæ omnia hic in terris habentur in spe, sed in patriâ habentur in re.

PSALMUS CXXXIII.

Titulus, & Argumentum: *Canticum graduum.*

Hic est Psalmus postremus gradualium, qui eos, qui jam feliciter ascenderunt, bortatur, ut vacent perpetuis laudibus: quod est officium habitantium in domo Domini. Pertinet tamen hic Psalmus suo modo ad eos, qui post ædificationem templi, in illo habitabant; & ad eos, qui, dum peregrinantur in terra, corde habitare nituntur in Cælo.

X. 1. Ecce nunc benedicite Dominum omnes servi Domini.

Ecce,

Ecce, nunc liberati à temptationibus,
& persecutionibus, tempus est, ut toti in-
tenti sitis laudibus Domini; proinde *be-
nedicite Dominum vos*, qui non habetis
aliud, in quo illi jam serviatis, nisi in sol-
vendo tributo perpetuæ laudis, & gra-
tiarum actionis.

*V. 2. Qui statis in domo Domini, in
atriis domus Dei nostri.*

Vos, inquam, qui permanentem ha-
betis domum, nec amplius ut peregrini
in tentoriis habitatis: nec solum domum,
sed & atria possidetis, ita ut & interio-
rem domum, ubi Deus viderur, & ex-
teriorum, ubi videntur creaturæ, quæ
sunt veluti atria, felicissimi habeatis.

*V. 3. In noctibus extollite manus vestras
in sancta, & benedicite Dominum.*

Hortatur servos Dei, ut nocturno
potissimum tempore extollentes manus
in Sancta Sanctorum, ubi erat propitia-
torium, & Arca Dei, benedicat Domi-
num. Moraliter significat Deum lau-
dandum & in die prosperitatis, & in
nocte tribulationis. Sed in sensu præ-
cipue intento significatur, in Cælo, si-
cuti semper est dies, si de luce, & tene-

C s bris

bris agatur, ita semper esse noctem, si
agatur de labore, & requie. In his igi-
tur quietissimis, sed lucidissimis noctibus
extollite manus vestras beati servi Dei, &
ad sanctuarium verum, ubi Deus ipse
resideret, conversi benedicite Dominum.

v. 4. *Benedicat te Dominus ex Sion,*
qui fecit Cælum, & terram.

Hortatus erat servos Dei, ut assiduè
Deum benedicerent; nunc vicissim illis
à Deo benedictionem precatur: sed uti-
tur numero singulari, *Benedicat te &c.,*
quia videbat eos ita esse glutino veræ
charitatis unitos, ut essent unum in Do-
mino.

PSALMUS CXXXIV.

Titulus, & argumentum: *Alleluja.*

Duo Psalmi sequentes ejusdem sunt ar-
gumenti; hortantur nempe fideles ad laudes
Dei: unde rectè subjunguntur Psalmis gra-
dualibus, quia optimè convenienter iis, qui
ex captivitate in patriam redierunt, qui-
que jam gradus perfectionis, Deo juvante,
vel ascenderunt, vel in ascensione non ma-
dicum profecerunt.

v. 1. *Lau-*

V. 1. *Laudate nomen Domini, laude-*
te servi Dominum.

V. 2. *Qui statis in domo Domini, in*
atriis domus Dei nostri.

Hi duo V. V. habentur in initio Psal-
mi præcedentis, sed ideo repetuntur, ut
continuetur laudatio, quæ ibi fuerat in-
choata. Hæc non solùm conveniunt iis,
qui ad Cælestem patriam jam pervene-
runt, sed & illis etiam, qui spe, ac de-
siderio in eâ domo degere incipiunt, &
cum Apostolo dicere possunt: *Nostra*
autem conversatio in Cælis est. Conve-
niunt illa specialiter Sacerdotibus, quo-
rum officium est stare in domibus Deo
sacris, & ipsi Deo immediate, & pro-
priè ministrare.

V. 3. *Laudate Dominum, quia bonus*
Dominus; psallite nomini ejus, quoniam
suave.

V. 4. *Quoniam Jacob elegit sibi Do-*
minus, Israel in possessionem sibi.

Adducit tres rationes, quibus per-
suadeat, laudandum esse Dominum.
Primò quia Deus dignissimus est omni
laude: est enim ipsa bonitas, omne in
omnino boni rationem continens; nec
quid-

quidquam bonum est, nisi ex ejus participatione, & dono. Secundò quia id nobis bonum, & jucundum est: & quidem beatissimis in Cælo psallere Deo suavissimum est, & ideo ne ad momentum quidem cessant à laudibus Divinis, quoniam dulcedinem Dei in ipso fonte suavitatis sine intermissione degustant. Nobis autem nunc dulce est canere Deo, nunc laboriosum, quia non semper gustamus, quam suavis sit Dominus; sed tunc solum, cum ex gratiâ Dei, & præviâ meditatione assurgimus ad cognitionem, & accendimur ad amorem. Tertiò quia tenemur, præter cæteros obstricti tot beneficiis: Deus enim singulari dono gratiæ suæ filios Jacob in populum peculiarem sibi delegit; gentiles per Apostolos, & Prophetas ad fidem vocavit, & per fidem in populum suum elegit; unde justum est, ut is populus præter omnes alias gentes Deum laudet.

*V. 5. Quia ego cognovi, quod magnus
est Dominus, & Deus noster præ omnibus
Diis.*

*V. 6. Omnia quæcunque voluit Domi-
nus fecit in Cælo, in terra, in mari, & in
omnibus abyssis.*

Re-

Respondet objectioni, quæ fieri poterat, cur ipse tanto ardore invitaret populum Dei ad laudes Domini. *Quia,* inquit, ego cognovi, quod Dominus non solum magnus sit super omnes homines, sed etiam super omnes Deos: & ideo silere non possum, ideo clamo, ideo psallo, & ad canendum omnes invito. Deinde utrumque probat; & primò, quod fit magnus Dominus, ostendit ab omnipotentiâ: *Quia omnia quæcumque voluit, liberrimâ voluntate fecit in universâ creatura, in cœlo, in terrâ, in mari, oceano, & in omnibus abyssis, seu maribus mediterraneis, vel locis subterraneis.* Ergo non nos ipsi, sed Deum laudemus.

X. 7. *Educens nubes ab extremo terræ, fulgura in pluviam fecit.*

Quæ facit Deus mirabilia in Angelis, Cælis, abyssis, nobis incognita sunt; ponit igitur exemplum eorum in Cælo aereo, in terrâ, & in aquis, quæ à nobis videntur, licet causas ignoremus. Qui educit nubes vel ab oriente, vel ab occidente, vel à Septentrione, vel à Meridie, quæ sunt quatuor extrema terræ, ut ad sensum nostrum de Mundo loquamur.

Et

Et quamvis ista assiduitate viluerint, tamen omnino mirabile est, unde tanta copia vaporum repente existat, ut totum Cælum in puncto ferè temporis nubibus quasi velo cooperiat: nisi ideo mirabile esse desinat, quia ab Omnipotente fit. Subjungit secundum mirabile: *Fulgura in pluviam*, h. e. in pluvia fecit, sive inter pluviam miscuit fulgura; quæ res est omnino mirabilis: nam fulgura sunt ardentia, arentia, acutissima; & pluvia est res humida, frigida, mollis, & tamen nec fulgura absumunt aquam, nec pluvia extinguit fulgura.

¶. 8. *Qui producit ventos de thesauris suis, qui percussit primogenita Ægypti ab homine usque ad pecus.*

¶. 9. *Et misit signa, & prodigia in medio tui Ægypte; in Pharaonem, & in omnes servos ejus.*

Tertium exemplum magnitudinis Dei sumitur à generatione ventorum: hi enim notissimi sunt, & quotidie sentiuntur à nobis, & tamen nihil est obscurius generatione ipsorum, præsertim dum repente existit ventus, & paulò post

pōst repente cessat. Verē venti producuntur de thesauris Dei, h. e. de locis absconditis de potentia Dei secretissimā, & ditissimā, quæ nunquam exauriri potest. Cum hoc tertio exemplo conjungit occisionem omnium primogenitorum Ægypti, tam hominum, quam jumentorum; & ratio hujus conjunctio-nis est: quia sicut venti spiritus quidam sunt corporales, qui non videntur ob nimiam subtilitatem: & tamen maximas edunt strages arborum in campis, domo-rum in urbibus, navium in mari; sic spiritus Angelici, invisibles oculis homi-nūm, incredibili celeritate ad nutum Domini interfecerunt omnia primogenita Ægypti, tum hominum, tum ju-mentorum. Nec cædes illa poterat tribui pesti, aut morbo naturali, cùm eadem nocte perierint omnia, & sola primo-genita Ægyptiorum, apud Hebræos verò apud Ægyptios degentes omnino nullus perierit. Quæ subjungit, vid. Exod. C. 7. 8. 9. 10. 11. 12.

V. 10. Qui percussit gentes multas, & occidit Reges fortes.

V. 11. Segon

¶. 11. Segon Regem Amorrhæorum,
¶ Og Regem Basan, ¶ omnia Regna
Chanaan.

¶. 12. Et dedit terram eorum hæredi-
tatem, hæreditatem Israel populo suo.

Ad mirabilia Dei in Ægypto addit alia
edita in itinere debellando potentissimos
Reges, Sehon, Og, item 31. Reges in
terrâ promissionis; item muri Jericho
corruerunt ad sonitum tubarum; Sol,
& Luna steterunt ad imperium Josuæ &c.
Vide Num 21. Jos. 6. 10. & 12. Ipse
igitur Deus dedit totam illam terram
possidendam, & quasi propriam hære-
ditatem populo suo Israelitico. Sic Reg-
num Cælorum, per terram promissio-
nis significatum, vult quidem Deus à
fidelibus suis bellando, & laborando ca-
pi; sed quia, nisi ipse præveniret, co-
mitaretur, & subsequeretur gratiâ suâ
labores nostros, nihil omnino facere
possemus, ideo ipse est, qui nos salvat,
ex captivitate liberat, & hæreditatem
æternam donat.

¶. 13. Domine nomen tuum in æter-
num, Domine memoriale tuum in genera-
zione & generationem.

¶. 14. Quia

¶. 14. *Quia judicabit Dominus populum suum, & in servis suis deprecabitur.*

Concludit primam partem probatioris, quâ ostendit magnitudinem Dei: Propter hæc tanta mirabilia, memoria tua, fama tua in æternum vigebit; tum idem repetit, & subdit rationem: quia Deus semper, ut hactenus fecit, justo judicio vindicabit de persequentibus eum, puniens iniquos hostes ejus, & erga servos suos erit exorabilis. Illud deprecabitur passivè sumendum est.

¶. 15. *Simulacra gentium argentum, & aurum, opera manuum hominum.*

¶. 16. *Os habent, & non loquentur, oculos habent, & non videbunt.*

¶. 17. *Aures habent, & non audient, neque enim est spiritus in ore ipsorum.*

Jam probat, Deum nostrum magnum esse præ omnibus Diis; quod erat alterum affirmatum ¶. 5. Licet non magnum sit Deo, majorem esse Diis aureis, & argenteis, ut monet S. Hilarius, cum longè major sit Regibus, Dæmonibus, Angelis; tamen voluit Propheta conferre Deum cum simulacris, ut clarius ostenderet infirmitatem Deorum gentilium; tum

D etiam

etiam quia, licet Dii gentium essent Dæmonia, Ps. 95., multi tamen gentilium id ignorabant, putantes ipsa simulacra esse Deos. Demum quia ex his argumentis colligitur etiam infirmitas ipsorum Dæmonum, qui simulacris suis non potuerunt dare sensum, & vitam, sicuti Deus verus simulacro suo, quod est homo, dedit spiritum vitae, sensum, motum, & quod est excellentius, dedit rationem, & libertatem arbitrii. Cetera patent ex Ps. 113. à v. 12.

v. 18. *Similes illis fiant, qui faciunt ea;
Et omnes, qui confidunt in eis.*

v. 19. *Domus Israel benedicite Dominum,
Domus Aaron benedicite Dominum.*

v. 20. *Domus Levi benedicite Dominum,
qui timetis Dominum, benedicite Dominum.*

Facta collatione Dei veri cum Diis falsis, confert cultores falsorum Deorum cum cultoribus veri Dei, & illis, per modum imprecationis, prædicit similitudinem Deorum suorum, nempe illos fore mutos, cæcos, surdos, quoad vera bona intelligenda, & quaerenda, & laudanda; cultores autem Dei invitat ad benedicendum Dominum, quia vident, audiunt, loquun-

loquuntur, ut imagines vivæ Dei viventis, & ideo debent exercere linguam ad laudandum Deum, à quo habent sentire, vivere, intelligere. Invitat autem primò in genere *domum Israel*, h.e. populum Dei; tum per partes, *Domum Aaron*, h.e., Sacerdotes; *Domum Levi*, h.e., Levitas, Sacerdotum ministros; demum *omnes timentes Deum*, h.e. *Lai-cos omnes.*

*XV. 21. Benedictus Dominus ex Sion,
qui habitat in Jerusalem.*

Concludit orans, ut omnes Cives Sion, & Jerusalem non cessent benedicere Domino, qui Rex magnus est, & in ipsâ Jerusalem sedem Regni sui collocavit; quæ convenient Ecclesiæ Christianæ militanti, sed multò magis triumphanti.

PSALMUS CXXXV.

Titulus, & Argumentum: *Alleluja.*

Psalmus idem argumentum habet, quod Psalmus præcedens; invitat nempe populum Dei ad laudem misericordiæ Divinæ;
& in singulis ¶. ¶. repetit, Quoniam in

D 2 æternum

æternum misericordia ejus; ut ostendat,
omnia opera Dei, sive ad creationem, sive
ad providentiam, sive ad redemptionem
pertineant, non ex necessitate, aut debito,
sed ex solâ Dei misericordiâ profecta esse,
ut bonitatem suam communicaret.

¶. 1. Confitemini Domino, quoniam
bonus, quoniam in æternum misericordia
ejus.

¶. 2. Confitemini Deo Deorum, quo-
niam in æternum misericordia ejus.

¶. 3. Confitemini Domino Domino-
rum, quoniam in æternum misericordia
ejus.

In his tribus ¶. ¶. laudatur Deus ab
his, quæ in se habet; in sequentibus
autem laudatur ab operibus suis. Dici-
tur Deus bonus, & quidem absolutè:
nec solùm in se bonus est, sed etiam in
æternum mesericordia ejus est: nam ipse,
qui est sumnum bonum, nullum habet
admixtum malum, nullam miseriam,
& ideo solus potest mala, & miseras
aliorum tollere, & tollet in æternum.
Illud Dominus ¶. 1. hebraicè significat
ipsum esse; unde ¶. 1. tribuitur Patri,
qui est fons essendi, & communicat
suum

Iuum esse Filio per generationem, & Spiritui S. per spirationem, Sibi, Filióque communem. ¶ 2. tribuitur Filio Dei unigenito, qui est Deus Deorum, seu Angelorum, & hominum, qui à scripturâ quidem Dii dicuntur, nempe adoptivi, in se tamen creaturæ sunt. ¶ 3. tribuitur Spiritui S.: dominium enim fundatur in naturâ liberi arbitrii, illi sunt Domini qui faciunt, quod volunt; illi servi; qui aliorum voluntati subjiciuntur. Princeps autem libertatis Spiritus S. est, *Ubi Spiritus Domini, ibi libertas*, 2. Cor. 3.

¶ 4. *Qui facit mirabilia magna solus, quoniam in æternum misericordia ejus.*

Hic, & deinceps subintellige, *Confitemini Domino*. Incipit laudare Deum ab operibus magnis, & mirabilibus, quæ solus ipse facere potuit, ut sunt opera creationis: nam in ceteris usus est Deus operâ Angelorum, vel aliarum creaturarum. In his verò operibus laudatur præcipue misericordia ejus, quia nihil fecit ex necessitate, quasi egeret creaturis, sed ex misericordiâ suâ magnâ, & ineffabili.

¶. 5. *Qui fecit Cælos in intellectu,
quoniam in æternum misericordia ejus.*

Primum opus Dei fuit Cælum. Fe-
cit autem Cælos per sapientiam, & bo-
nitatem suam, intelligendo, & volendo,
quæ sunt quasi duæ manus ejus. Ita-
que non laboravit, non fatigatus est,
non eguit morâ temporis, non instru-
mentis variis, non materiâ, circa quam
operaretur, non adjutoribus admini-
stris. *Quoniam in æternum &c., quia
placuit ei parare æternam Domum An-
gelis, & hominibus.*

¶. 6. *Qui firmavit terram super aquas,
quoniam in æternum misericordia ejus.*

Alterum opus principale fuit terra:
in hâc triplex cernitur misericordia Dei:
una respectu terræ, quam eduxit ex ni-
hilo; altera respectu aquæ, cui sedem
stabilem præparavit; terția respectu ho-
minum, quibus dedit *terram firmatam
super aquas*, h. e., aquis discoopertam,
& tamen aquis irrigatam, ut possent in
eâ degere, eam colere, & frugiferam
reddere.

¶. 7. *Qui fecit luminaria magna, quo-
niam in æternum misericordia ejus.*

¶. 8.

¶. 8. Solem in potestatem diei, quoniam in æternum misericordia ejus.

¶. 9. Lunam, & stellas in potestatem noctis, quoniam &c.

Tertium opus magnum, & mirabile fuit fabricatio Solis, Lunæ, & Stellarum, quæ ad Cælum, & terram pertinent: nam Cælum mirificè exornant, & terræ mirificè prosunt, quia lucendo, & illuminando, præsunt operibus nostris tum diurnis, tum nocturnis, ut dicitur Gen. I.

¶. 10. Qui percussit Ægyptum cum primogenitis eorum, quoniam in æternum misericordia ejus.

¶. 11. Qui eduxit Israel de medio eorum, quoniam &c.

¶. 12. In manu potenti, & brachio excelso, quoniam &c.

¶. 13. Qui divisit mare rubrum in divisiones, quoniam &c.

¶. 14. Qui eduxit Israel per medium ejus, quoniam &c.

¶. 15. Et excussum Pharaonem, & virtutem ejus in mari rubro, quoniam &c.

¶. 16. Qui traduxit populum suum per desertum, quoniam &c.

¶. 17. Qui percussit Reges magnos,
quoniam &c.

¶. 18. Et occidit Reges fortes, quo-
niam &c.

¶. 19. Sebon Regem Amorrhæorum,

¶. 20. Et Og Regem Basan, quo-
niam &c.

¶. 21. Et dedit terram eorum bæredi-
tatem, quoniam &c.

¶. 22. Hæreditatem Israel servo suo
quoniam &c.

Laudatur hic Deus ab opere provi-
dentiæ, & sunt omnia perspicua ex L.
Exod. & Ps. 134. Percussio Ægypti,
occisio primogenitorum, & Regum &c.
sunt opera justitiæ respectu impiorum
interfectorum ; sed quia hæc intende-
bantur à Deo ad liberandum populum
suum, illa omnia simpliciter tribuuntur
misericordiæ. ¶. 12. illud *in manu po-*
tenti, & in brachio excelso significat Deum
graviter punivisse Ægyptum plagis mul-
tis. ¶. 13. illud *in divisiones*, significat
in duas partes. ¶. 15. illud, & *virtu-*
tem ejus, significat exercitum ejus.

¶. 23. *Quia in humilitate nostra Ime-*
mor fuit nostri, quoniam in æternum &c.

¶. 24.

¶. 24. *Et redemit nos ab inimicis nostris quoniam in æternum &c.*

Hæc referri possunt ad liberationem Judæorum à servitute Pharaonis, Philistinorum, Nobuchodonosoris; item ad liberationem Ecclesiæ à persecutione Tyrannorum, Hæreticorum; demum maximè propriè ad liberationem Eleotorum à captivitate Diaboli, & omnibus periculis hujus saeculi. *Per humiliatem intellige afflictionem.*

¶. 25. *Qui dat escam omni carni, quoniam in æternum misericordia ejus.*

Hunc ¶. addit pro iis, qui non patiuntur persecutionem, ne putarent, si bi non esse necesse confiteri Domino. Ait itaque: *Confitemini, laudate Deum omnes omnia, quia ipse est, qui nutrit, & conservat omnem creaturam viventem, & præcipue hominem.*

¶. 26. *Confitemini Deo Cæli, quoniam in æternum misericordia ejus.*

¶. 27. *Confitemini Domino Domini-
rum, quoniam in æternum misericordia ejus.*

Concludit repetendo duos ultimos
¶. ¶. ex primo ternario: nam per *Deum*

D s Cæli

Cæli, ut notat S. Aug., intelligit Deum Deorum. Dicitur *Deus Cæli*, quia ipse solus Deus verus Cælum fecit, & in eo, velut throno suo residens, demonstrat se Deum Deorum esse.

PSALMUS CXXXVI.

Titulus: *Psalmus David Jeremie.*

Hoc titulo caret Hebræus, legitur tamen in Græco, & Latino: nec significat, Jeremiah in Babylone fuisse, sed Psalmum compositum esse à Davide, prævidente, & prædicente captivitatem Babyloniam, quam postea Judæis imminentem Jeremias prædicavit, & præsentem deploravit, & finem ejus post 70. annos futurum denuntiavit. Unde à quocunque fuerit additus titulus, non est rejiciendus, quasi falsam historiam contineret.

Argumentum Psalmi est lamentatio captivorum, desiderium patriæ, & prædictio severissimæ animadversionis in Babylonios, & Idumæos: quæ à Davide scriptæ sunt, non tam ut simplicem historiam futuram narraret, quam ut admoneret Hebreos, ut, quando in Babylonem ducerentur

tur captivi, non afficerentur rebus Babyloniis, sed assidue ad patriam suspirarent. Altiori sensu admonentur omnes Electi, quomodo se gerere debeant in exilio, & captivitate hujus saeculi.

V. 1. Super flumina Babylonis, illic sedimus, & flevimus, cum recordaremur tui Sion.

Verba sunt captivorum in Babylone, qui in agris ad vilia opera deputati degabant, & ad ripas fluminum, quibus ea provincia abundat, aliquando fessi sedebant, & ex recordatione, & desiderio patriæ siebant. Flumina Babylonis sunt bona hujus saeculi, quorum desiderio Electi abripi se non sinunt, imò, iis contemptis, deplorant captitatem suam, dum recordantur dulcissimæ patriæ, quæ est in sancto monte Sion.

V. 2. In salicibus in medio ejus suspendimus organa nostra.

Captivi Hebræi organa lætitiae, citharas suspendebant in salicibus in medio Babylonis, h. e. palam, Babylonis viuentibus, abjiciebant à se instrumenta lætitiae, ut ostenderent, sibi fletum magis cordi esse, quam cantum. Electi, intelli-

telligentes captivitatem, & exilium, non cantant, & lætantur cum Babyloniiis, & de rebus Babyloniae; cantant tamen in cordibus suis Domino, & gaudent in spe futuræ beatitudinis.

*V. 3. Quia illic interrogaverunt nos,
qui captivos duxerunt nos, verba cantionum.*

V. 4. Et qui abduxerunt nos: hymnum cantate nobis de canticis Sion.

Non solùm ob mœstitiam suspenderunt citharas suas in ramis arborum captivi Judæi, sed etiam ne obsequerentur Babyloniiis, audire, & irridere cupientibus sacros hymnos, quos in celebratibus Domini cantare soliti erant. Noluimus organis nostris uti, ne sacra cantica irrisioni gentilium exponeremus: quia *ii*, qui nos captivos duxerunt, *illuc*, in suâ regione, interrogaverunt nos de verbis cantionum, & dixerunt, qui abduxerunt nos: *hymnum cantate nobis de canticis Sion.* Illud, interrogaverunt &c. potest etiam verti, rogaverunt, petierunt, ut caneremus.

*V. 5. Quomodo cantabimus canticum
Domini in terra aliena?*

Quam-

Quamvis ideo canere nolebant, ne sacri hymni ab infidelibus irriderentur; hoc tamen non responderunt, ne Dominos suos offenderent; sed quod justæ causæ speciem habere poterat. Responderunt igitur, ob mœrorem captivitatis, non posse se cantare cantica læta, ut in patriâ suâ solebant. Electi, scientes lætitiam propriam esse patriæ, gemitum exilii, & captivitatis, dicunt: Quomodo possumus lætis canticis operam dare, inter tot pericula, & tentationes?

v. 6. *Si oblitus fuero tui Ierusalem, oblivioni detur dextera mea.*

v. 7. *Adhæreat lingua mea faucibus meis, si non meminero tui.*

v. 8. *Si non proposuero Ierusalem in principio lætitiae meæ.*

Totus populus introducitur jurans, & firmiter statuens, se nunquam oblizioni mandaturum patriam, imò imprecatur sibi per juramentum execratorium: *Si oblitus fuero tui, Ierusalem, quod fiet, si pulsare incipiam citharam in terra alienâ, pereat dextera mea, arescat, non sit ulli usui. Adhæreat lingua mea faucibus meis, ut moveri nequeat, si cantando*

tando in terrâ alienâ demonstrabo, me tuî non amplius meminisse; imò etiam utrumque fiat, si initium, & summa lætitiæ meæ non fuerit civitas S. Jerusalem. Electi nec in prosperis, nec in adversis oblidiscuntur patriæ cælestis; optant carere manu, & linguâ, si gloriæ Dei, & saluti æternæ deservire non debeant; nullâ in re seriò lætari nôrunt, nisi in spe, & desiderio cæli.

¶. 9. *Memor esto Domine filiorum Edom, in die Ierusalem.*

¶. 10. *Qui dicunt, Exinanite, exinanite usque ad fundementum in ea.*

¶. 11. *Filia Babylonis misera, beatus qui retribuet tibi retributionem tuam, quam retribuisti nobis.*

¶. 12. *Beatus qui tenebit, & allidet parvulos tuos ad petram.*

Prædictit in fine Psalmi perditionem Idumæorum, & Babyloniorum, qui persecuti sunt filios Israel. Idumæi descendebant ab Esau fratre Jacob, qui & *Edom* dictus est. Ait ergo: *Memor esto Domino filiorum Edom*, seu Idumæorum, quid nempe egerint, quando *Ierusalem* affligebatur, & evertebatur Baby-

Babylonii: hoc autem egerunt; hortati sunt Babylonios, & dixerunt: *Exinanite &c.*, evacuate, effodite urbem à fundamentis. Transit deinde ad Babyloniam, & per modum imprecationis prædicit eis ruinam: *Filia Babylonis misera*, h.e. Urbs Babylon, quam ego miseram esse prævideo, licet nunc tibi felicissima videaris. Rex Persarum, & Medorum *beatus* erit, quia prosperabitur adversus te, & retribuet tibi mala, quæ tribuisti nobis. Quod factum esse testatur *Dan. C. 5.*, & *Isaias C. 13.* prædixit, quod hoc loco David etiam prædicit, tantâ crudelitate sævituros Medos, & Persas in Babylonios, ut etiam infantes eorum ad parietes allisuri sint, & sine ullâ miseratione interficiuntur. Moraliter per *Idumæos* intellige homines carnales, per *Babylonios* ipsos Dæmones. Retribuer ergo Deus Babyloniae retributionem, quam retribuit nobis: quia sicut Rex Babyloniae Dæmon captivos nos fecit vinculo culpæ, nempe peccati originalis: sic in die judicii Rex Jerusalem Christus Diabolum captivum faciet, & alligabit vinculis æternæ pænæ, ut nulli amplius

amplius nocere possit; nec Diabolum solum, sed & omnes carnales homines, piorum persecutores captivos faciet, quos alligabunt Angeli in fasciculos ad comburendum. Et sicut Dæmon parvulos Christi, h. e. eos, qui non creverunt, nec profecerunt in Christo, captivos facit: sic beatus est, qui parvulos Babyloniae, h. e. eos, qui minus creverunt in vitiis, allidit ad petram, quæ est Christus, occidens peccato, ut justitiae vivant.

PSALMUS CXXXVII.

Titulus: *David.*

In græcis libris, quos nunc habemus, invenitur titulus Aggæi, & Zachariæ, sed videtur additus à Recentioribus: nam Hebræus tantum legit: *David*; sed nec ullus veterum legit, Aggæi, & Zachariæ, nec Hilar., nec Hieron., nec Chrysost., nec Aug., nec Theodoret., nec Euthym.: itaque meritò contemnendus est.

Argumentum est gratiarum actio, quod exaudierit Deus humilem orationem suam; & probabiliter videtur petuisse adventum

uentum Messiae, & gratias agere, quod ex-auditus præviderit, & prædicere potuerit Christi gloriam, & conversionem gentium.

V. 1. Confitebor tibi Domine in toto corde meo; quoniam audisti verba oris mei.

Pollicetur sacrificium laudis, & gratiarum actionis, non verbis tantum, sed ex intimo corde, & summo mentis ardore, & pro beneficio omnium maximo, pro salute suâ, & totius populi æternâ, eo quod oratio sua sit exaudita.

V. 2. In conspectu Angelorum psallam tibi, adorabo ad templum sanctum tuum, & confitebor nomini tuo.

Declarat, confessionem suam fore talem, qualem requirit excellentia Auditorum. Scio, me psallentem tibi, ab Angelis, qui tibi assistunt, videri, & attendi, & ideo ita consideratè me geram in psallendo, ut qui intelligam, in quo theatro consistam. O si omnes hâc attentione Deo Psalmos caneremus, vel oraremus!

V. 3. Super misericordia tua, & veritate tua, quoniam magnificasti super omne nomen Sanctum tuum.

E

Hæc

Hæc erit materia canticorum meorum: In toto corde laudabo te super magnâ illâ misericordiâ tuâ, & fidelitate tuâ, quâ, sicut promisisti Patribus, misertus generis humani, *magnificasti Sanctum, seu Christum tuum*, dando nomen super omne nomen. Misericordia illa ineffabilis est, & in æternum prædicanda, cùm genus humanum depressum per peccatum usque ad inferos, Deus exaltaverit in Christo super omnes Cælos, & super res creatas; & sic implevit cumulatissimè veritatem suam, quâ promissis suis stare solitus est.

X. 4. In quacunque die invocavero te, exaudi me: multiplicabis in anima mea virtutem.

Ex eo quòd *magnificasti Sanctum tuum*, confidenter peto, ut semper per illum Advocatum nostrum exaudias me, quocunque tempore *invocavero te*; nihil aliud peto, nisi ut robores animam meam, ut resistam cupiditatibus, ut tolerem patienter adversa, ut ambulem semper in viâ justitiæ, ut vim inferam Regno Cælorum, ut ad eum, quem *magnificasti*, aliquando perveniam.

X. 5.

V. 5. *Confiteantur tibi Domine omnes Reges terræ, quia audierunt omnia verba oris tui.*

Dixit v. 3., *Magnificasti Sanctum tuum*, prædicens futurum per verbum præteriti temporis, more propheticō: sic jam prædictit futuram conversionem gentium, per modum imperantis, *Confiteantur &c.*: magnificato Sancto tuo per Resurrectionem, & Ascensionem, *confitebuntur tibi confessionem laudis omnes Reges terræ*, quia per Apostolos audierunt, quidquid Mundo revelare dignatus es.

V. 6. *Et cantent in viis Domini, quoniam est magna gloria Domini.*

Pergit explicare mysterium vocatio-
nis gentium. Ambulabunt Reges, &
eorum populi *in viis Domini*, non in-
viti, & mœsti; sed læti, & volentes
cantando, *Quoniam magna est gloria Do-
mini.* Cognoscent enim quotidie magis,
ac magis, quām magna Dominus fece-
rit, quām magnificè glorificaverit Chri-
stum suum, caput nostrum, & quæ
sint divitiæ gloriæ hæreditatis ejus in
Sanctos.

v. 7. Quoniam excelsus Dominus, & humilia respicit, & alta à longè cognoscit.

Hæc est magna gloria Domini, quod cum excelsus, immò altissimus sit naturā, dignitate, potentiā, sapientiā, imperio; tamen humilia de proximo respicit, quia ad humiles descendit; & verè in Filio suo in terris visus est, & cum hominibus conversatus est. Et alta &c. à superbis longè recedit, eos projicit à se, ut patuit in Diabolo.

v. 8. Si ambulavero in medio tribulationis, vivificabis me: & super iram inimicorum meorum extendisti manum tuam, & salvum me fecit dextera tua.

Quia Deus excelsus humilia benignissime respicit, David conscius propriæ humilitatis, cum fiduciâ sibi pollicetur opem Dei in omni tribulatione. Si ambulavero in medio tribulationis, ita ut undique tribulantibus, & tentantibus cinctus sim, tu tamen vivum, illæsum, incolumem me servabis: nam (et sæpe pro nam legitur) super iram inimicorum, me undique circumstantium, & devorare cupientium, tu extendisti manum tuam, ut eorum furorem compesceres,

&

& conatus impedires; & sic *salvum me fecit potentia*, & *virtus tua*, quæ est Christus.

v. 9. *Dominus retribuet pro me, Domine misericordia tua in sæculum, opera manuum tuarum ne despicias.*

Explicat modum, quo *dextera Domini salvos nos facit*. *Dominus*, qui est *dextera tua*, retribuet tibi Deo Patri premium pro peccatis meis, & inimicis meis vindictam: *Domine misericordia tua in sæculum durat*, seu finem non habet; ideo peto, ut opera, quæ tu misericorditer inchoasti, inspirans fidem, spem, & charitatem, non deseras, sed conservando, augendo, perficiendo consummes.

PSALMUS CXXXVIII.

Titulus: *In finem Psalmus David. Titulus hic jam sæpe alias explicatus est ab initio Psalterii.*

Argumentum *Psalmi controvertitur*; probabiliter voluit David admonere genus humanum, Deum esse magnum remuneratorem operum bonorum, & malorum contra severum Judicem; atque ut illud per-

E 3 suadeat,

suadeat, prolixè disputat de Dei scientiâ, quâ exactissimè, & profundissimè novit omnia nostra, naturam, opera, verba, cogitationes.

v. 1. Domine probasti me, & cognovisti me, tu cognovisti sessionem meam, & resurrectionem meam.

Loquitur David de se, & in personâ generis humani. Tu Domine non es contentus quâcunque cognitione rerum nostrarum, sed voluisti accuratissimè cognoscere, ut faciunt, qui examinant, & probant; & re ipsâ accuratissimè cognovisti me. Hoc dictum generatim tum explicat: Tu cognovisti ab æternitate, quando, quomodo, & quâ de causâ sedere, vel surgere deberem; nec solùm corporaliter, sed & moraliter, h. e. quando, cur, & quomodo humiliandus, vel exaltandus essem. Et hæc multò magis novit de Christo, capite omnium hominum, & Angelorum; unde Ecclesia in die Resurrectionis hunc

v. recitat.

v. 2. Intellexisti cogitationes meas de longè, semitam meam, & funiculum meum investigasti.

Nec

Nec solum cognovisti exteriora nostra, humiliationem, & exaltationem, sed & interiora: nam multò antè, quām cogitare inciperem, tu nōsti, quid essem cogitaturus; item nōsti progressum meum, itinera mea, tum corporalia, tum multò magis spiritualia, h. e. consilia, & deliberationes; item nōsti finem, & metam, ad quam perventurus essem; quam hæreditatem, quam quietem assecuturus. In summâ, ab æterno intellexisti principia, media, & finem actionum mearum. Funiculus in scripturâ significat hæreditatem, possessiones, quæ funiculis dividebantur.

¶. 3. *Et omnes vias meas prævidisti, quia non est sermo in lingua mea.*

Dixerat, Deum prævidisse cogitationes, consilia, eventus; nunc addit generatim omnes alios motus: Prævidisti omnes alios motus meos usque ad verba inutilia, & otiosa; *quia non est sermo in lingua mea*, supple, quem tu non prævideris. Omnia igitur Deus tempore suo in judicium adducet.

¶. 4. Ecce Domine tu cognovisti omnia novissima, & antiqua: tu formasti me, & posuisti super me manum tuam.

Duobus argumentis demonstrat Deum omnia scire. Ecce tu cognovisti omnia futura in diebus novissimis, & præterita ab antiquissimo tempore. Igitur exactè scit etiam actiones humanas, quæ inter creata non ultimum locum obtinent. Tu præterea formasti me, fecisti hominem, regis, conservas; alias in suum nihilum rediret.

¶. 5. Mirabilis facta est scientia tua ex me, confortata est, & non potero ad eam.

Etsi nobis certum sit, dari in Deo scientiam omnium, ipsa tamen nobis incomprehensibilis est, præsertim quomodo prævideat futura libera, quæ pro arbitrio hominis possunt esse, & non esse, ut cogitata, desideria, verba, & pleraque opera. Ait igitur: Mirabilis, h. e. mirabilior facta est scientia tua, quam ut ego eam possim assequi. Tum idem confirmat: Confortata est, prævaluuit adversum me, sive altius elevata est, quam ut ego eam apprehendam.

¶. 6.

V. 6. Quò ibo à spiritu tuo? & quo à facie tuâ fugiam?

V. 7. Si ascendero in Cælum, tu illic es;
si descendero in infernum, ades.

V. 8. Si sumpero pennas meas dilucu-
lo, & habitavero in extremis maris.

V. 9. Etenim illuc manus tua deducet
me, & tenebit me dextera tua.

Alio argumento ostendit, neminem esse, qui possit latere scientiam Dei, quia videlicet Deus ubique est, & omnia penetrat. Quò ibo, & quò fugiam, ut à tuâ mente, & intelligentiâ abscondar? Si ascendero in cælum, tu illic es; si descendero in profundum abyssi longissimè à Cælo situm, ibi quoque tu idem ipse ades. Si dentur mihi pennæ, & manè surgens velocissimè fugiam ab oriente, & habitem in ultimo Occidente, non tamen effugere te potero: nam manus tua deducet me, & tenebit me, quia sîne tuo auxilio moveri non possum.

V. 10. Et dixi, Forstan tenebræ con-
culcabunt me; & nox illuminatio mea in-
deliciis meis.

V. 11. *Quia tenebræ non obscurabuntur à te, & nox sicut dies illuminabitur: sicut tenebræ ejus, ita & lumen ejus.*

Objicit ipse sibi: Forsitan tenebræ densissimæ operient me, & sic effugiam oculos Dei. Et respondet, id fieri non posse: nam nox respectu oculorum Dei non est nox, nec obscura, sed illuminabit, & patefaciet me, in deliciis meis impuris versantem. Tum idem clariùs repetit: quia tenebræ non obtenebrescent apud te; & nox non erit obscura, sed velut lucida dies: perinde est apud te, sive sint tenebræ noctis, sive lumen diei, quia non minùs vides in tenebris noctis, quàm in luce diei.

V. 12. *Quia tu possedisti renes meos: suscepisti me de utero matris mee.*

Probat, Deum in tenebris videre. Hinc apparet, tibi perinde esse tenebras, & lucem, quia tu formasti, & formando tuos effecisti *renes meos*, partes scil. secretas, & absconditas, ubi est sedes internæ cupiditatis; proinde affectus mei, & desideria mea in manu tua sunt: nec solum *renes meos*, sed me totum in ute-

ro

ro latentem suscepisti formandum, & fovisti formatum.

V. 13. Confitebor tibi, quia terribiliter magnificatus es: mirabilia opera tua, & anima mea cognoscet nimis.

Interrumpit narrationem de opificio humano per Apostrophen ad Deum, & admirans magnitudinem scientiae, & sapientiae Dei in hoc opere, ait: *Confitebor tibi confessionem laudis, quia terribiliter terrore admirationis, & reverentiae magnificatus es.* Admiranda sunt opera tua in formatione hominis in utero matris tam obscuro; & anima mea valde sataget cognoscere magnitudinem horum operum tuorum.

V. 14. Non est occultatum os meum a te, quod fecisti in occulto: & substantia mea in inferioribus terrae.

Redit ad scientiam, & sapientiam Dei in opificio humano. Non latet scientiam tuam ossatura mea, ut sic loquar, h.e. qualia, & quam multa ossa lateant intra carnem humanam, quia tu ipse ea fecisti, & quidem in occulto, nempe in utero matris, & intra pellem, & carnem nostram. Tum idem repetit: non

est

est occultata à te substantia corporis mei,
etiam adhuc latens in profundo utero,
ut metallum in visceribus terræ.

X. 15. *Imperfectum meum viderunt
oculi tui, & in libro tuo omnes scribentur:
dies formabuntur, & nemo in eis.*

Pergit in eâdem scientiâ Dei: Corpus informe, embryonem, in quo nondum apparet forma, & distinctio membrorum, oculi tui viderunt, & cognoverunt, quid indè fieri deberet, & quò evasurum esset: nam habes apud te exemplaria, sive ideas omnium, ut pictor, vel sculptor scit, ex informi materiâ, quid futurum sit, quia videt exemplar. In dies formabuntur informia corpora, & perducentur ad perfectionem suam, ut in exemplari relucent. *Et nemo in eis,* supple, deerit, vel, ut est in Hebræo, nihil in eis deerit. *Nota:* illud *dies*, ut patet ex græco, est in accusativo, ut sensus sit *in dies*. Novit etiam Deus imperfectum nostrum quoad animæ dotes, sapientiam, prudentiam, virtutes, gratiam, gloriam; nos scil. nihil esse, nisi massam informem; sed juxta descriptionem in libro vitæ, in dies formamur,

mūr, & perficimur, donec efficiamur conformes imagini Filii Dei, & configuremur corpori claritatis ejus. Atque ad hanc perfectionem tam excellentem corporis, & animæ, ad quam ex tantâ imperfectione perducuntur amici Dei, respiciens Propheta, exclamat id, quod sequitur:

¶. 16. *Mibi autem nimis honorificati sunt amici tui Deus, nimis confortatus est principatus eorum.*

Meo iudicio, valde omnino, & supra, quām intelligam, honorificati sunt amici tui, Deus, valde omnino roboratus est, & stabilitus principatus eorum: nam educti ex massâ perditionis, & captivitate Dæmonis, facti Angelis æquales, & Christi cohæredes, transferuntur ad Regnum æternum.

¶. 17. *Dinumerabo eos, & super arenam multiplicabuntur, exurrexi, & adhuc sum tecum.*

Docet, principatum amicorum Dei confortatum esse ex eo, quod brevi mirifice sit auctus. Conabor numerare amicos Dei, qui principatu fruentur, vel subditos eorum, & præ multitudine

nume-

numerare non potero, quia plures erunt, quam grana arenæ in littore maris. Ex cognitione tam ingentis gloriæ amicorum Dei, surrexi per amorem, & desiderium in te, & adhuc tibi inhaereo, cupidus perseverandi usque in finem.

¶. 18. *Si occideris Deus peccatores, viri sanguinum declinate à me.*

¶. 19. *Quia dicitis in cogitatione, accipient in vanitate civitates tuas.*

Optaverat amicorum Dei consor-tium, jam Dei inimicorum amicitiam recusat. Si tu Deus justo tuo judicio, ut probos honorificabis, & exaltabis, ita peccatores reprobabis, & damnabis: ego nolo istorum consortium, ideo di-co vobis impiis: *Viri sanguinum, animalium occifores, declinate à me:* quia cogitatis apud vos, & in corde vestro dicitis: *justi civitates Dei frustra accipient,* quia brevi auferemus ab eis. Hæc re-feruntur ad dicta ¶. 6. quia scil. per propagationem Ecclesiæ, infidelium ad fidem conversionem, & impiorum ad justitiam, civitates, h. e. cœtus plurimi ablati fuerant à Dæmonum servitute, &

Idolo-

Idololatrarum Dominio; ideo dicebant impii, qui reliqui erant, in corde suo, invidentes propagationi Regni Christi, *Accipient in vanum civitates*, quia sperabant, brevi fore, ut eas recuperarent.

¶. 20. Nonne qui oderunt te Domine, oderam: & super inimicos tuos tabescerem?

¶. 21. Perfecto odio oderam illos, & inimici facti sunt mihi.

Qui evigilavit in Deum, & illi pleno corde adhaesit, nihil mirum est, si profiteatur se odiisse eos, qui Dominum oderant; & si tabesceret ex tædio, & dolore, cum videbat offendit ab impiis Dominum suum. Illud, *Perfecto odio*, refert S. Aug. ad virtutem charitatis, quæ diligit personas, & odit iniquitatem. Unde subdit: non ego illis, cum eos diligam, & emendari cupio, sed illi *michi facti sunt inimici*, qui oderunt increpationem, & converti ad justitiam nolunt.

¶. 22. Proba me Deus, & scito cor meum: interroga me; & cognosce semitas meas.

¶. 23. Et vide, si via iniquitatis est in me, & deduc me in via æterna.

Quod

Quod v. i. dixerat, Deum fecisse, nunc ipse rogat, ut faciat, h. e., ut perget scrutari, & eximinare cor, & semitas ejus, h. e. cogitationes, desideria, progressus, & actiones, ejus. Finem verò scrutationis esse cupit, ut, si Deus videat in ipso viam iniquitatis, quæ ducit ad acquirenda temporalia; abstrahat eum indè, & deducat in viam æternam, h. e. ad ea cogitanda, desideranda, facienda, quæ pertinent ad bona æterna.

PSALMUS CXXXIX.

Titulus: *In finem Psalmus David.*

Recentiores secuti Theodoretum, Psalmi hujus argumentum esse docent precationem Davidis adversùs Saulem Regem, & ministros ejus. Sed veteres P. P. Hieron. Chrysost. Aug. argumentum esse volunt, precationem corporis Christi adversùs Diabolum, & satellites, iniquos homines, ut probat S. Hilarius.

v. i. *Eripe me Domine ab homine malo, à viro iniquo eripe me.*

Christus loquitur, juxta Hilarium, in personâ suâ, & membrorum suorum:
Eripe

*Eripe me ab homine malo, sive Diabolus,
qui est inimicus homo (ut hic loquitur
S. Aug.) per se, sive per homines sibi
subjectos, me infestet. Tum idem re-
petit.*

*X. 2. Qui cogitaverunt iniquitates in
corde, tota die constituebant prælia.*

Dat rationem, cur dixerit, *Eripe
me*, quia scil. patitur infestationem co-
gitationum, verborum, & factorum, ut
desideria impudica, tentationes infideli-
tatis, scrupuli, perplexitas mentis &c.;
quæ omnia dici possunt prælia assidua,
ut nullæ dentur inducæ, nulla inter-
missio.

*X. 3. Acuerunt linguas suas sicut ser-
pentis: venenum aspidum sub labiis eorum.*

Alterum malum, quod patimur ab
inimicis, est malum verborum: & qui-
dem finis malorum hominum calumnian-
tium, detrahentium &c. est lucrum, vel
vindicta temporalis; sed finis Diaboli est
pertrahere hominem ad peccata. *Acue-
runt viri illi mali linguas suas sicut serpen-
tis*, ut facilius penetrarent in aures, &
corda: *Venenum aspidum nocentissimum*

F

sub

sub labiis eorum reconditum est, quod per linguam jaculantur in auditores.

¶. 4. Custodi me Domine de manu peccatoris, & ab hominibus inquis eripe me.

Hoc est tertium malum, quod ad rem ipsam pertinet. Ac primò petit cœtus justorum protectionem, ne manus peccatoris, Diaboli, appropinquet, & noceat; deinde ut etiam eripiat ab hominibus inquis, qui membra sunt Diaboli, ne & ipsi nocendi potestatem accipient.

¶. 5. Qui cogitaverunt supplantare gressus meos: absconderunt superbi laqueum.

¶. 6. Et funes extenderunt in laqueum: juxta iter scandalum posuerunt mili.

Describit malum, quod ab inquis timebat. Dæmon, & Angeli ejus in hoc unum semper intenti sunt, ut supplantent gressus nostros, ut non ambulemus in viâ Dei, ut cadamus in eâ &c., id autem faciunt abscondendo, & multiplicando laqueos, eosque juxta viam constituendo. Porrò abscondunt laqueum, h. e. in actibus peccaminosis manifestant voluptatem, utilitatem, sed tegunt malitiam. Illud, funes extendere &c. significat, laqueos multiplicare, post laqueum adul-

adulterii tendere laqueum homicidii &c.
Illud *juxta iter* &c. significat in ipsa viâ,
quæ est lex Domini, nulla esse offendicu-
la; at si ceperis à viâ declinare, continuo
laquei inveniuntur. Cautè ergo ambu-
landum est, nec pes exira viam legis
Dei ponendus.

V. 7. *Dixi Domino, Deus meus es tu,*
exaudi Domine vocem deprecationis meæ.

V. 8. *Domine, Domine virtus salutis*
meæ, obrumbrasti super caput meum in die
belli.

Adversùs tot pericula invocat openi
Dei, sinè quâ nihil possimus facere.
Dixi Domino, Deus meus es tu, &
per hoc ego sum populus tuus: Do-
minus meus es tu, servus tuus sum
ego: quare ad te pertineo, ideo *exaudi*
vocem deprecationis meæ. Deinde, ut
ostendat præsentia, & urgentia pericula,
iterum clamat Domino: Confidenter te
rogo, quia tu solus es robur, unde pen-
det salus mea, h. e. per quod ab inimi-
cis salvus esse potero. Jam aliàs pro-
tectionem tuam expertus sum: cùm
enim ab hostibus graviter oppugnarer,
tu fuisti mihi instar galeæ, & auxilio

F 2 caput

per
ec-
e.
ad
etit
nus
&
ni-
oli,
nt.
are
un.
m:
uis
ioc
an-
nus
id
lti-
am
m,
ant
na-
ni-
m

caput meum texisti, ut mortem imminentem evaderem.

V. 9. Ne tradas me Domine à desiderio meo peccatori: cogitaverunt contra me, ne derelinquas me, ne fortè exaltentur.

Petit semper obumbrari ab æstu malii desiderii: nisi enim concupiscentia mala nos ceperit, frustra Dæmones tentant, frustra homines sœviunt. Domine, ne sinas me tradi à desiderio meo peccatori, Dæmoni nempe, vel homini tentanti. Cupio, ut non derelinquas me sínè umbraculo gratiæ tuæ; quia inimici contra me meditati sunt insidias, & si fortè cœperint me, gloriabuntur, & exultabunt, quasi non me solum, sed etiam te superaverint.

V. 10. Caput circuitus eorum, labor labiorum ipsorum operiet eos.

Prædict futuras impiorum poenas. Summa insidiarum, quibus impii quasi per vias distortas circuibant, ut justos perderent, in eosdem recidet. Tum idem repetit: afflictio, & miseria, quam labiis suis procurabant justis, in ipsos recidet, eosque opprimet.

V. 11.

¶. 11. *Cadent super eos carbones, in ignem dejicies eos, in miseriis non subsistent.*

Pergit explicare pœnas impiorum. Illud, *carbones ignis*, significat acerrima supplicia; illud, *Cadent*, significat, ea supplicia ab alto descendere, nempe à judicio Dei Judicis supremi. In *ignem dejicies eos*, h. e. à copiâ carbonum super eos cadentium obruentur, & oppressi miseriis, ita jacebunt, ut se attollere, surgere, & subsistere non possint.

¶. 12. *Vir linguosus non dirigetur in terra, virum injustum mala capient in interitu.*

Ad pœnas æternas jam addit pœnas hujus vitæ. Vir promptus ad loquendum, mendax, adulator, detractor, calumniator, rixosus non prosperabitur in terrâ: tales enim odio passim habentur & à bonis, & à malis. Imò mala, quæ talem linguosum, & ideo injustum capient, non erunt ad præmium patientiæ, ut justis esse solent, sed ad interitum sempiternum.

¶. 13. *Cognovi quia faciet Dominus judicium inopis, & vindictam pauperum.*

¶. 14. Veruntamen justi confitebuntur
nomini tuo, & habitabunt recti cum vultu
tuo.

Concludit, certam esse liberationem,
& felicitatem justorum, ut etiam suppli-
cia, & miseriam impiorum. Cognovi,
certò scio tum ab experimento proprio,
tum ab exemplis majorum, tum ab ipsâ
Dei justitiâ, & promissis, quod Dominus
justissimè judicabit causas pauperum
suum, & vindicabit illos, puniens
digno supplicio persecutores eorum.
Ipsi autem justi, non sibi tribuentes in-
nocentiam, sed gloriam dantes gratiæ
Dei, laudabunt Dominum in æternum,
videntes facie ad faciem, & fruentes vi-
sione ejus.

PSALMUS CXL.

Titulus: *Psalmus David.*

Argumentum idem est, quod in Psal-
mo superiore, scil. ardens oratio ad Deum.

¶. 1. Domine clamavi ad te, exaudi
me, intende voci meæ, cum clamavero ad te.

Verba sunt corporis Christi, seu cœ-
rûs fidelium, inter hostes constituti.
Magna

Magnâ voce interiori, magnóque cordis affectu invocavite, Domine, ut opem ferres inter tot pericula laboranti, ideo exaudi me, nec solum hodie, sed quotiescumque *clamavero ad te*, tu quoque intende voci meæ aures tuas.

V. 2. Dirigatur oratio mea sicut incensum in conspectu tuo; elevatio manuum mearum sacrificium vespertinum.

Explicat, quid petat, & in quo velit exaudiri à Deo. Ac primò petit gratiam bene orandi. *Dirigatur &c.* oratio mea ad te per modum thymiamatis. Porrò quatuor illa, ex quibus constabat thymama, nempe thure, galbano, onyche, stacte, sunt quatuor virtutes, Fides, Fiducia, Charitas, & Humilitas, ex quibus componitur oratio Deo gratissima. Et oratio, quam elevatis manibus fundo, sit velut sacrificium incensi, quod ad vesperam offerebatur.

V. 3. Pone Domine custodiam ori meo, & ostium circumstantiae labiis meis.

Petit secundò donum loquendi, & tacendi, quando oportet. Os meum est quasi porta, unde exeunt verba, & per verba exeunt cogitata, & facta; un-

de rogo, ut adhibeas custodiam, janitorem nempe, qui diligenter custodiat; & quia solus janitor ægrè custodire potest hanc portam, rogo etiam, ut adhibeas ostium circumstant, seu munatum, ut expugnari non possit. Porro ostiarius est *Spiritus consilii*, ut sciat homo, quando, quomodo, & quid loqui, vel tacere debeat; & ostium est *Spiritus fortitudinis*, ut audeat loqui, quod oportet, & timeat loqui, quod non oportet.

X. 4. *Non declines cor meum in verba malitiæ, ad excusandas excusationes in peccatis.*

Tertiò petit, ut, quia, adhibitâ etiam omni custodiâ, tamen fragilitas humana facit, ut erremus, Deus auxilio suo nobis concedat, ut peccata liberè confiteamur, ne, dum excusando sani videri volumus, à Cælesti medico non sanemur. Non permittas, ut, quando peccavimus, cor nostrum declinet in verba mendacii, & simulationis, ad excusanda peccata variis prætextibus.

X. 5.

V. 5. *Cum hominibus operantibus ini-
quitatem, & non communicabo cum electis
eorum.*

Quarto petit custodiri à familiaritate impiorum: multi enim innocentiam conservarent, nisi in perversos amicos, & sodales inciderent. Porrò pars prima v. pendet à superiori, & sensus est: Non patiaris me quærere excusationes peccatorum, ut ii faciunt, qui iniqui sunt, ut non siam socius eorum; & sic per gratiam tuam adjutus, *non communicabo cum electis eorum*, hebraicè, non communicabo in mensâ cum dulcibus cibis eorum. Malorum conversatio in conviviis maximè nocet.

V. 6. *Corripiet me justus in misericor-
dia, & increpabit me: oleum autem pecca-
toris non impinguet caput meum.*

Quintò petit, ut ex gratiâ Dei incidamus in amicos ex charitate corripientes, non in adulatores falsis laudibus decipientes. Reprehendet me pecantem vir justus in charitate, quia miseretur languens; iste, inquam, *increpabit me*, severius castigans delicta mea: *oleum autem pecca-
toris &c., per unguentum, quo suaviter,*

& cum voluptate perungitur caput, significatur blandiloquentia peccatoris, qui peccata extenuat, vel excusat, imò etiam sub aliquo colore, ut benefacta laudat.

¶. 7. *Quoniam adhuc & oratio mea in beneplacitis eorum: absorpti sunt iuncti petræ Judices eorum.*

Obscurissimus hic ¶. ex Chrys. hunc sensum habere potest: Non solum non communicabo cum impiis; sed *adhuc oratio mea* ad Deum est contra eorum vitia, & scelera, in quibus ipsi placent. Sed ipsi, sicut Judices, seu Principes eorum, & duces ad malum, citò peribunt, qualis est eorum interitus, qui absorben- tur à fluctibus marinis, dum agitati ab undis alliduntur ad scopulos.

¶. 8. *Audent verba mea, quoniam po- tuerunt, sicut crassitudo terræ erupta est super terram.*

Petit ad id, quod dixerat, *Oratio mea in beneplacitis eorum:* multi impii, qui sibi ipsi in peccatis complacebant, au- dent verba mea, & convertentur ad Deum, *quoniam verba mea potuerunt, ef- ficiacissima fuerunt ad conterenda corda eorum;*

eorum; sicut durities, & crassities terræ erumpi, seu scindi solet ligone, vel aratro super terram.

X. 9. *Dissipata sunt ossa nostra secus infernum: quia ad te Domine, Domine, oculi mei: in te speravi, non auferas animam meam.*

Ultimò petit; sicut ab initio, ut scil. Deus animas nostras liberet ab omni periculo temptationum. Ob multitudinem, & gravitatem temptationum, ossa, seu virtus, & fortitudo nostra ita dispersa, & debilitata est, ut penè ad nihilum redacta sit: & quia in his omnibus *ad te, Domine, ad tuum auxilium respexi, in te speravi, oro, ut non finas me perire.*

X. 10. *Custodi me à laqueo, quem statuerunt mibi, & à scandalo operantium iniquitatem.*

Declarat, unde timeat mortem. *Custodi me à laqueo, quem statuerunt mibi insidiatores Dæmones, sive is laqueus sit concupiscentia carnis, sive concupiscentia oculorum, sive superbia vitæ; & à scandalis, exemplis carnalium, cupidorum, superborum.*

v. 11. *Cadent in retiaculo ejus peccatores : singulariter sum ego, donec transeam.*

Hæc postrema admonitio docet, hominem esse liberi arbitrii, & simul valde consolatur eos, qui timent Deum. *Cadent*, ait, in rete principis venatorum, qui est Diabolus, qui sunt, & esse volunt peccatores : ego autem solitarius ero, donec transeam omnes laqueos, & retia ; de Mundo non ero, ut peregrinus esse cogar, donec transeam ad patriam, ubi nulla erunt pericula. Non satè est ad tempus declinare à moribus peccatorum ; sed perseverandum est usque ad finem.

PSALMUS CXLI.

Titulus : *Intellectus David cùm esset in spelunca, Oratio.*

Sensus tituli est : *in hoc Psalmo declaratur prudentia, & sapientia David, qui cùm esset delitescens in speluncâ, sapienter cogitavit, unicum remedium in tantis malis esse orationem ad Deum.* Fugerat nimis David à Saule ad Regem Achis, & ab illo etiam male habitus, contulit se in speluncam Odollam solus, ubi incidit in maximum

maximum vitæ periculum, Vide 1. Reg.
C. 22.

Argumentum est oratio ad Deum,
quā liberationem petit à periculo imminente.
Psalmus altiori sensu refertur ad Christum
filium David, cùm oraret in borto, vel in
cruce desertus ab omnibus, & in mortis
præsentissimæ periculo constitutus.

¶. 1. *Voce mea ad Dominum clamavi:
voce mea ad Dominum deprecatus sum.*

¶. 2. *Effundo in conspectu ejus oratio-
nem meam, & tribulationem meam ante
ipsum pronuntio.*

Ponit argumentum Psalmi. *Voce
meā* tum internā cordis, tum externā oris
ad *Dominum clamavi, & deprecatus sum.*

¶. 2. Bis idem dicit. Porrò effunditur
oratio, cùm tota paulatim ex vase cordis
producitur, ut ab aliquo videatur; quod
fit, si tribulatio in oratione per partes ad
aures audientis pronuntiatur. Illud, *in
conspectu ejus,* significat orationem factam,
ubi solus Deus videbat, in speluncā, qua-
si in clauso cubiculo, ut Christus postea
monuit esse orandum.

¶. 3. *In deficiendo ex me spiritum
meum: & tu cognovisti semitas meas.*

Ex-

Explicat, cur, & quando pronuntiaverit tribulationem suam coram Deo. Cùm, ait, ex me ferè discederet spiritus meus vitalis, cùm deficeret vita mea, & in viciniâ mortis essem. Hoc rectè applicatur Christo in horto, vel cruce oranti; item S. S. Martyribus pro fide agonizantibus. Oravi autem ad te, quia tu omnium optimè nôsti actiones, & studia mea, & nôsti, quâm sinè ullâ causâ hæc patiar.

v. 4. *In via hac, qua ambulabam, absconderunt laqueum mihi.*

Explicat infidias inimicorum. In viâ justitiæ, & mandatorum Dei, in quâ ambulabam, absconderunt &c. Sic Judæi ex ipsis bonis operibus Christi captabant occasionem eum accusandi. Notat hîc S. Aug., non in ipsâ viâ Domini, sed juxta illam posse poni laqueos, ut dictum est Ps. 139. v. 6.; Unde sensus est: illi cum sint extra viam, & putent se esse in viâ, ponunt laqueos juxta viam, putantes se ponere in viâ: sed justus non declinans à viâ justitiæ nec ad dexteram, nec ad sinistram, laqueos omnes evadit.

v. 5.

¶. 5. Considerabam ad dexteram, & videbam; & non erat, qui cognosceret me.

Explicat jam violentiam. Inimici enim, quibus insidiæ non profuerunt, convertunt se ad vim apertam. In illâ verò pressura considerabam ad opem amicorum, & videbam, num quis mihi socius, & amicus adesset, & nullus mihi notum se esse confiteri ausus est. Sic Christum Petrus negabat, reliqui fuge-
rant, & stabant à longè.

¶. 6. Periit fuga à me, & non est qui requirat animam meam.

Nec solum ab aliis auxilium non ha-
beo, sed nec fùgâ me ipsum juvare pos-
sum: nec invenitur, qui sollicitus sit de
vitâ meâ, ne pereat. *Periit fuga à Da-*
vide, quia fugere non poterat; à Chri-
sto, quia fugere nolebat; ipse sibi, &
Pater ei fugam interdixit.

¶. 7. *Clamavi ad te Domine, dixi, tu*
es spes mea, portio mea in terra viventium.

Exclusus igitur ab omni humanâ ope,
clamavi ad te, Domine, dixi, tu es spes mea
in hac peregrinatione, & hæreditas mea
in terrâ viventium. Sinit Deus amicos
suos in terrâ peregrinationis affligi, ut
in

in patriâ gloriosius coronet. Hæc eadem Christus loquitur de corpore suo mystico, quod est Ecclesia; vel de proprio hoc sensu: Quia non est, qui requirat vitam meam corporalem, ne perireat; *clamavi ad te Domine Pater*, dixi, tu es exspectatio mea, ut non des *Sanctum tuum videre corruptionem*, sed ostendas illi vias vitæ: tu quoque facies, ut caro mei glorificata per resurrectionem, adipiscatur per ascensionem hæreditatem suam in supernâ Jerusalem, quæ est terra viventium.

¶. 8. *Intende ad deprecationem meam, quia humiliatus sum nimis.*

¶. 9. *Libera me à persequentibus me, quia confortati sunt super me.*

Duplici argumento petit à Deo liberationem, tum quia ipse nimium sit depresso, seu afflatus, cùm solus lateret in speluncâ; tum quia inimici ejus sint exaltati, & adversum se innocentem viribus prævaluerint, cùm hostis ejus Saul exercitum armatum duceret. Christus humiliatus fuit nimis, quia se ipsum humiliavit, factus obediens usque ad mortem, mortem autem Crucis; item nimis humiliatus

Hiatus, cùm penderet inter latrones,
cui jure convenit sedere super Cheru-
bitum. Et inimici ejus veri confortati
erant valde, quando venit hora ipsorum,
& potestas data est tenebris, ut in ipsum
Solem justitiæ ad tempus prævalere vi-
derentur.

X. 10. *Educ de custodia animam meam
ad confitendum nomini tuo: me exspectant
justi, donec retribuas mibi.*

S. Chrysost. dat hunc sensum: *Educ*
me de his afflictionibus, ut de hâc spe-
luncâ egressus, & liberè ubique discur-
rens, laudem nomen tuum: id enim ex-
spectant omnes justi, ut à tuâ providentiâ
tribuatur mihi innocentî liberatio. At
fortè David altiori sensu optat educi de
mortali corpore, velut de custodiâ: illi
enim verè confitentur nomini Domini,
qui illuc ascendunt, ubi qui habitant,
in sæcula sæculorum laudant Dominum:
& exspectabant Prophetam justum ani-
mæ S. S. Patriarcharum in limbo, donec
requies tribueretur ei; & S. S. Angeli in
Cælo, donec æterna felicitas retribue-
retur meritis ejus. Christus orat educi
de custodiâ corporis passibilis, & anima-

lis, & induere per resurrectionem corpus impassibile, & spirituale; ut, qui laboraverat prædicando populis, deinceps requiescat laudando Patrem: omnes enim justi, & qui mortui fuerant ab origine Mundi, & qui vivebant in carne, ut Apostoli, aliique fideles discipuli, exspectabant maximo desiderio Christum resurgentem, & debitâ retributione gloriæ exaltatum, quia ex plenitudine gloriæ ejus omnes accepturi erant, fideles vivi Spiritum S., mortui è Limbo transitum ad Regna Cælorum.

PSALMUS CXLII.

Titulus: *Psalmus David, quando eum filius suus persequebatur.*

Hebræus solum legit, Psalmus David; cetera verba, explicandi argumenti gratiâ, à Septuaginta addita esse, affirmat S. Hilarius.

Argumentum: *David, persecutionem Absalonis, pœnam peccati sui esse agnoscens, peccata sua deplorat, & misericordiam à Deo postulat. Hinc enim Ecclesia Catholica hunc Psalmum inter septem pœnitentiales numerat, quia præscribit David exemplo*

exemplo suo formam precandi veris pænitentibus; atque hunc sensum persequitur S. Chrysostomus.

*V. 1. Domine exaudi orationem meam,
auribus percipe obsecrationem meam, in
veritate tua: exaudi me in tua iustitia.*

David corde contrito, & interno gemitu petens culpæ remissionem, ait: *Domine exaudi orationem meam* (non addit, quid petat, quia credebat Deum videre desiderium cordis) quam tu bene intelligis, quæ sit. Tum idem bis repetit. Per *veritatem intellige fidelitatem*, quâ Deus servat promissa de veniâ pœnitentibus dandâ. Per *justitiam intellige fidelitatem*, quæ est pars *justitiae*, quam jam antè vocavit *veritatem*.

V. 2. Et non intres in judicium cum servo tuo, quia non justificabitur in conspectu tuo omnis vivens.

Petuit remissionem peccati ex promissione, & fidelitate Dei, nunc addit aliud argumentum ex conditione, & fragilitate generis humani. Noli mecum judicio contendere, neque ego resistere audebo, aut justum me dicere; sed peccatum meum confitebor: deinde nec

G 2 ego

ego solus, sed omnis vivens cadet causâ, si tecum judicio contendere voluerit: nam & justus cadit septies de die.

X. 3. *Quia persecutus est inimicus animam meam, humiliavit in terra vitam meam.*

Tertia ratio, quam adducit ad impetrandam veniam peccatorum, sumitur ex gravitate temptationis: nec enim sponte suâ, & nullo tentante peccavit, ut Angeli reprobi, sed gravissimâ Dæmonis temptatione tum ad adulterium, tum ad homicidium. *Quia persecutus est &c. humiliavit &c.* h. e. me vilem, & contemptibilem reddidit in conspectu tuo, & S. S. Angelorum; & terræ amatorem fecit, qui antea in cælestibus conversabar.

X. 4. *Collocavit me in obscuris, sicut mortuos saeculi: & anxiatus est super me spiritus meus, in me turbatum est cor meum.*

Pergit in explicatione calamitatum, quas Diabolica persecutio per peccatum adserit. Postquam enim animam humiliavit ad terram, seu terrenis cupiditatibus implicavit, *in obscuris* eam collocat, h. e. excœcat oculos mentis, ut falsa bona pro veris amplectatur; ut præcipitia non

non advertat; ut viam vitae non videat: imò in iis tenebris collocat, in quibus versantur à saeculo, seu jam dudum mortui, in quibus ne vestigium oculorum remanet. Quâ phrasî amplificat tenebras spirituales, in quibus versantur amatores Mundi: & quæ major obscuritas mentis, quam propter momentaneam voluptatem contemnere felicitatem aeternam? Sequitur, *Et anxiatus &c.*: indicat, se ex divino lumine cœpisse videre tenebras suas, & abjectionem animæ ad res terrenas diligendas; & inde consecutam esse anxietatem spiritus ex terrore Divini judicii, & ex misero statu, in quem cecidit propter peccatum: *in me turbatum &c.* idem aliter repetit. Atque hoc est initium pœnitentiae.

V. 5. *Memor fui dierum antiquorum,
meditatus sum in omnibus operibus tuis, &
in factis manuum tuarum meditabar.*

Docet, unde ex tanta anxietate respireare cœperit, & nobis exemplo suo viam ostendit ad respirationem post lapsum. Recogitare cœpi misericordiam tuam, quam ab initio Mundi Patribus nostris exhibuisti, portans infirmitates

G 3 eorum,

corum, sanans languores, & parcens peccatis. Nec solum obiter memor fui, sed diligenter consideravi omnia opera tua, sive gratiae, sive naturae, & in omnibus misericordiam eminere vidi. Et in factis &c. idem repetit.

V. 6. *Expandi manus meas ad te:
anima mea sicut terra sine aqua tibi.*

Spe concepta ex consideratione misericordiae Dei, ad eum aspicere, & suspirare incipit. *Expandi manus meas* in oratione ad te: quia anima mea ita sicut gratiam tuam, ut terra arida pluviam. Sicut terra sine aqua nec consistentiam habet, nec vestitur herbis, nec ornatur floribus, nec producit fructus; sed est inanis, & vacua: sic anima sine Dei gratia nec resistit tentationi, sed sicut pulvis jaestatur a facie venti: nec vestem habet gratiae, nec ornatum sapientiae, nec fructus bonorum operum: quod totum intelligit poenitens experimento suo, & ideo magis sicut, quia melius cognoscit.

V. 7. *Velociter exaudi me Domine,
defecit spiritus meus.*

Agnita

Agnita turpitudo peccati, & desiderium gratiae urget animam pœnitentis, ut non possit ferre moras reconciliations. Non possum diutius ferre turpitudinem meam; sana velociter languorem meum, quia in extremis ago, vix duco spiritum. Posuit præteritum, defecit, pro præsenti amplificandi gratiam. Verè pœnitens non differt confessionem, & remedia peccati.

v. 8. *Non avertas faciem tuam à me,
& similis ero descendantibus in lacum.*

Idem petit aliis verbis. Ne recuses reconciliari mihi; ne siam similis per euntibus, qui descendunt in lacum profundissimum gehennæ: quibus enim Deus non ignoscit, nec donat vitam gratiae, ii pereunt in æternum. Illud & hic, ut sæpè alias, ponitur pro *quia*, & sensus est: *Non avertas &c.; quia, si averteris, similis ero &c.*

v. 9. *Auditam fac mihi manè misericordiam tuam, quia in te speravi.*

Rufus ad idem reddit, sed aliâ ratione. Satis diu, te irascente, fui in nocte peccati; incipiat, te miserante, dies gratiae, & audiam in corde meo

vocem tuam, dicentem mihi: *Salus tua
ego sum: Quia in te speravi*, h. e. gratia
spei, quam jam accepi, mereatur gra-
tiam remissionis. Licet enim peccator
ex se nihil mereatur apud Deum, ta-
men ipsa gratia meretur augeri, ut
aucta mereatur & perfici, *uit S. Aug.*
Ep. 106.

*V. 10. Notam fac mihi viam, in qua-
ambulem, quia ad te levavi animam meam.*

Accepta justificatione, timens, ne ite-
rum cadat, petit sollicitè gratiam cognos-
cendi viam justitiae, & per eam ambulan-
di; quod est signum veri poenitentis. Illu-
mina mentem meam, ut cognoscam viam
justitiae, in qua ambulare debeo, ut ad
te perveniam: nam ad te direxi cursum
meum, & renuntians saecularibus desi-
deriis, te unum desidero.

*V. 11. Eripe me de inimicis meis Do-
mine, ad te configi, doce me facere volun-
tatem tuam, quia Deus meus es tu.*

Idem petit, rogans liberari à tenta-
tionibus Diaboli, qui saepe conatur ob-
scurare mentem, ne videat viam justitiae:
nam concupiscentiae à Diabolo excitatae
faciunt, ut res aliter appareant, quam
sunt

sint, & indè contingat error judicii.
Eripe me à temptationibus inimici; quia ad te confugi, & illi renuntiavi. Adjuva lumine tuo, ut, repulsis temptationibus, veram viam inveniam, & sic intelligam, quæ sit voluntas tua bona, beneplacens, & perfecta. Debeo, & cupio tibi uni servire, quia tu es Deus meus, principium, & finis omnium bonorum operum meorum, à quo naturam, & cetera bona animæ, & corporis accepi, à quo beatitudinem, & gloriam sempiternam exspecto.

¶. 12. *Spiritus tuus bonus deducet me in terram rectam: propter nomen tuum vivificabis me in æquitate tua.*

Petit sapientiam, quæ ad intelligentiam pertinet; jam petit charitatem, quæ pertinet ad voluntatem: tunc enim verè ambulamus per viam justitiae, si scimus, & volumus bene agere. *Spiritus, non meus, sed tuus, qui essentialiter bonus est, per quem diffunditur charitas in cordibus nostris, qui facit, ut velimus, & opereinur; ille deducet me in viam planam, & directam, quæ est lex tua. Tum ostendit, justificationem, quæ est*

G 5

quæ.

quædam vivificatio spiritualis, non ex meritis propriis, sed ex dono gratiæ Dei nobis contingere. Propter gloriam tuam ex gratiâ tuâ vivificabis me in justitiâ tuâ, seu fidelitate, quâ servas promissa.

V. 13. *Educes de tribulatione animam meam: & in misericordia tua disperdes inimicos meos.*

V. 14. *Et perdes omnes, qui tribulant animam meam, quoniam ego servus tuus sum.*

Concludit, prædicens salutem, & liberationem suam, & perditionem omnium inimicorum suorum: quod sinè dubio implebitur in ultimo judicio. Et quod de se David Propheta dicit, dici etiam potest de omnibus veris Dei servis, qui vel innocentiam custodierunt, vel per veram pœnitentiam ad viam iustitiae redierunt.

PSALMUS CXLIII.

Titulus: *Psalmus David adversus Goliath.*

Argumentum: *Canitur victoria Davidis adversus Goliath, ut titulus docet: spiri-*

*spiritualiter prædictitur victoria Christi,
& Ecclesiæ adversus Diabolum.*

*v. 1. Benedictus Dominus Deus meus,
qui docet manus meas ad prælum, & di-
gitos meos ad bellum.*

Laudat Deum, & gratias illi agit, quod dono ejus singulari vicerit gigantem, lapide ex fundâ jacto recte attin- gendo frontem hominis. Non ait, qui armat manus meas, sed, qui *docet* &c., quia *victoria* illa non roboris, sed maxi- mae artis fuit; nec tamen *victoriam* suæ arti, vel *exercitationi*, sed Dei dono tribuit. Sic Christus non robore, sed sapientiâ, patientiâ nempe, & humilitate superbū, & crudelem hostem Dia- bolum superavit. *Et digitos* &c. idem aliter repetit.

*v. 2. Misericordia mea, & refugium
meum, susceptor meus, & liberator meus.*

*v. 3. Protector meus, & in ipso spera-
vi, qui subdit populum meum sub me.*

Docet ordinem, quo Deus illi *victori-
am dederit*, & nobis daturus sit, si in
eo solum speremus. Primo, *misericor-
dia mea*: hæc est prima origo omnium
bonorum nostrorum & omnia omnino
merita

merita prævenit. Secundò, *Et refugium meum*: David misericorditer præventus, & vocatus, respexit ad Deum, & ad eum sperando, & invocando confugit. Tertiò, *Susceptor meus*, Deus confugientem ad se suscepit protegendum, & adjuvandum. Quartò, *liberator meus*, suscepit liberavit de captivitate, & ab imminente periculo vitæ. Quintò, *Protector meus*, liberatum, ne iterum caperetur, aut vulneraretur, protexit, & protegere pergit, dum prælium durat. Tum addit: & ego vicissim in ipso sperabo, qui fecit plus, quam petere, aut optare potuisse: nam fecit me principem militiæ super omnem populum, & fecit, ut populus se quietè regi finat. *Vide 1. Reg. 18. 2.*
2. Reg. 5.

¶. 4. *Domine quid est homo, quia innotuisti ei? aut filius hominis, quia reputas eum.*

Ex tot beneficiis prorumpit David in magnam admirationem, quod tantus Deus, quo nihil majus cogitari potest, dignetur tanti facere hominem, qui ferè nihil est, ut etiam velit ab illo cognosci,
&

& amari. Quid nos sentire, dicere, facere par esset, quibus Deus non solum innotuit, sed, formâ servi acceptâ, humiliavit semetipsum, factus obediens usque ad mortem crucis; & victoriam nobis donavit contra hostes visibiles, & invisibles; imò evexit ad participationem Regni sui, & omnium bonorum?

*V. 5. Homo vanitati similis factus est,
dies ejus sicut umbra prætererunt.*

Explicat causam admirationis suæ, nempe quòd homo sit res modica, & quidem brevi desinens esse, more umbræ transeuntis, & tamen capax sit magnorum honorum, si à Deo impleatur. Hæc ait David de homine quoad vitam temporalem, & comparatione factâ cum Deo: ceterùm homo magna res est, ad imaginem Dei factus, ad Deum cognoscendum, & amandum factus; quem Christus tanti fecit. Unde sicut pulvrem, & cinerem se reputare debet cum Deo collatus: ita dignitatem suam agnoscere debet, cùm ei bestiales voluptates à Dæmone suggeruntur; ut dedignetur delectari voluptatibus pecorum, qui ad Angelorum æqualitatem aspirat.

V. 6.

V. 6. Domine inclina Cælos tuos, &
descende: tange montes, & fumigabunt.

V. 7. Fulgura coruscationes, & dissi-
pabis eos: emitte sagittas tuas, & contur-
babis eos.

Admiratus, quod tanta Majestas tan-
tam vilitatem aspicere dignetur, jam con-
siderat superbiam, & cæcitatem multo-
rum hominum, qui, Deo contempto,
toti essent in opprimendis piis, & cumu-
landis terrenis bonis: unde roget Deum,
ut ostendat potentiam suam in ejusmodi
homines, ut saltem timore pœnæ pec-
care cessent, qui amore justitiae, & re-
verentiâ Conditoris bene agere nesciunt.
Domine, ait, quandoquidem humana
superbia ex beneficiis te non agnoscit,
nec timet; ostende præsentiam tuam per
nubes tenebrosas, per ignem de Cælo
demissum, per fulgura, & tonitrua, &
alia id genus, quibus homines terreri,
& expavescere cogantur. Deus *inclinat*
Cælos, dum demittit nubes, & densas
caligines, quæ videntur partes Cæli aërei;
dicitur *descendere*, quia per eos effectus
præsentiam suam demonstrat, ut fecit
Exod. 19. in monte Sina, quem simul
cale-

calefecit, ut totus fumigare videretur.
Per sagittas intellige cælestia fulmina,
quæ nemo non expavescit, adversus
quæ nihil valet humana defensio.

¶. 8. *Emitte manum tuam de alto,*
eripe me, & libera me de aquis multis, de
manu filiorum alienorum.

Rogaverat Deum generatim adversus
impios, & superbos, jam rogat pro se
in particulari. De Cælo potentiam tuam
ostende, & eripe, & libera me de aquis
multis, h. e. ut ipse explicat, *de manu*
filiorum alienorum, infidelium, qui ad li-
teram erant Philistæi; spiritualiter sunt
Hæretici, seu etiam quicunque impii.

¶. 9. *Quorum os locutum est vanita-*
tem, & dextera eorum dextera iniquitatis.

Dicit, filios alienos esse illos, qui ore,
& opere inqui sunt. *Quorum os locu-*
tum est vanitatem, non veritatem, non
legem tuam, non boni aliquid: & dex-
tera eorum non operatur, nisi rapinas,
oppressiones pauperum, adulteria, ho-
micia &c.

¶. 10. *Deus canticum novum cantabo*
tibi, in psalterio decachordo psallam tibi.

¶. 11.

¶. 11. *Qui das salutem Regibus, qui redemisti David servum tuum de gladio maligno: eripe me.*

¶. 12. *Et erue me de manu filiorum alienorum, quorum os locutum est vanitatem & dextera eorum dextera iniurias.*

Interponit duos ¶. ¶. quasi parenthesin, ex affectu in Deum; tum revertitur ad describendos filios alienos. Deus, pero alia multa beneficia, sed non sum oblitus acceptorum; ideo *canticum novum, præclarum, nondum auditum, cantabo tibi, & simul in psalterio decem chordarum psallam tibi, jungens sonitum psalterii cum laudatione vocis: id autem faciam, quia tu das salutem Regibus, ut paulò ante dedisti Sauli Regi per ministerium meum, & tu redemisti me Davidem servum tuum de gladio injusto Gigantis Goliath: tu igitur, sicut haec tenus fecisti, eripe me.* Erue, inquam, me de manu filiorum alienorum, qui & verbo, & opere scelestissimi sunt.

¶. 13. *Quorum filii sicut novellæ plantationes in juventute sua.*

Describit filios alienos ab affectu, & opinione ipsorum: Qui scilicet non sectantur,

Lectantur, nisi humanas felicitates, quas inter primo loco ponunt filios: tunc enim se felices putant, si filii eorum sunt in juventute suâ similes novellis plantationibus arborum, h. e. bene radicati, virides, florentes, ut spes sit, eos diutissime supervicturos.

V. 14. *Filiæ eorum compositæ circumornatæ, ut similitudo templi.*

Secunda eorum felicitas temporalis est, si filiæ sint formosæ, & ornatæ, ut facile viros inveniant, quibus nubant. Illud, ut similitudo templi, viderur significare ornatum tabernaculi, ut sunt purpura, byssus, aurum, gemmæ &c.

V. 15. *Promptuaria eorum plena, eructantia ex hoc in illud.*

Tertia eorum felicitas est, si promptuaria ita plena sint variarum frugum, aliarumque rerum ad hujus vitæ usum, ut necesse sit ex uno in aliud exonerare copiam rerum.

V. 16. *Oves eorum fætosæ abundantes in egressibus suis: boves eorum crassæ.*

Quarta eorum felicitas sunt oves fœcundæ, quæque plurimæ conspiciantur, cum egrediuntur ad pascua: & si-

mul cum gregibus ovium armenta
boum, & quidem pinguium.

¶. 17. *Non est ruina maceriæ, neque
transitus, neque clamor in plateis eorum.*

Ultima felicitas, si domus, & pa-
latia ruinam nullam minentur, sed ipsæ
etiam maceriæ, quæ ex vili maceriâ eri-
guntur, integræ maneant: & nullus sit
tumultus, concursatio tumultuantium,
nec clamor in plateis eorum, sed om-
nia tranquilla, & pacata.

¶. 18. *Beatum dixerunt populum cui
hæc sunt: beatus populus cuius Dominus
Deus ejus.*

Concludit, referendo ex sententiâ
filiorum alienorum, beatum esse popu-
lum, cui hæc sunt, quæ paulò antè de-
scripsimus: sed ex propriâ sententiâ di-
cit, beatum esse populum, qui habet
pro Deo verum Deum. Interim nota,
differentiam inter filios Dei, & filios
alienos non consistere in copiâ, vel ino-
piâ rerum temporalium, cùm etiam di-
vites pii esse possint, & pauperes impii,
sed in affectione: qui bona temporalia
tanti faciunt, ut præ illis contemnant
eterna, vel ut malint Deum offendere,
quàm

quam illorum jacturam facere, filii gehennæ sunt. Qui verò bona tempora-
lia, parva bona, & jacturam eorum,
parva mala esse dicunt, ut revera sunt;
contrà verò gratiam Dei, & Cælestem
patriam in maximis bonis reponunt, &
offensionem Dei, ac vitæ æternæ detri-
mentum, mala gravissima putant, sunt
filii Dei.

PSALMUS CXLIV.

Titulus: *Laudatio David.*

Græcè legitur, Laudatio ipsi David;
unde sensus tituli est, Laudatio Dei inspi-
rata, & dictata à Spiritu S. ipsi Davidi.
Vide titulum Psalmi 3.

Argumentum Psalmi patet ex titulo;
est scilicet perpetua Laudatio Dei, quæ su-
nitur tum ab ipsâ Dei magnitudine, tum
ab operibus ejus, tum à qualitatibus Regni
ipsius, tum à virtutibus Regiis, quæ in
ipso perfectissimè inveniuntur. Est autem
Psalmus alphabeticus, ut facilius memo-
ria commendetur, & delectabilius canatur.

H 2

Aleph.

Aleph. ¶. 1. *Exaltabo te Deus meus
Rex, & benedicam nomini tuo in sæculum,
& in sæculum sæculi.*

Beth. ¶. 2. *Per singulos dies benedi-
cam tibi, & laudabo nomen tuum in sæ-
culum, & in sæculum sæculi.*

Docet, quid in hoc Psalmo canere proposuerit. Celebrabo te versibus meis, ut tu; qui es altissimus, altissimus etiam habearis, & prædiceris ab hominibus. Vocat Deum *Regem suum*, vel ut ostendat se Regem esse sub Rege Deo, qui omnes regit, & à nullo regitur; vel quia Deum celebrare intendit ob ea præcipuè attributa, vel opera, quæ illi conveniunt, ut Rex est, & Gubernator rerum omnium. Insuper addit, lauda-tionem hanc fore perpetuam, ita ut hic incipiat, & perseveret per successiones hominum canentium hos Psalmos usque ad finem Mundi, & deinde in Cælo nunquam deficiat. Illud, *per singulos dies*, significat, dum vivam, sive in prosperis, sive in adversis &c.

Gimel. ¶. 3. *Magnus Dominus, &
laudabilis nimis, & magnitudinis ejus non
est finis.*

Quatuor

Quatuor sunt quasi partes magnitudinis, *latitudo*, *longitudo*, *sublimitas*, & *profundum*. Igitur incipit laudare Deum à magnitudine vel essentiæ Divinæ, quæ est magna quoad latitudinem, quia immensa; quoad longitudinem, quia æterna; quoad sublimitatem, quia altissima; quoad profunditatem, quia incomprehensibilis: vel y. intellige de Deo, ut Rex est: est enim *Rex magnus*, quoad latitudinem, quia omnia serviunt ei à summo Angelo usque ad ultimum vermiculum; quoad longitudinem, quia Regni ejus æterna duratio est; quoad sublimitatem, quia potestate summâ, & absolutissimâ regnat; quoad profunditatem, quia non solum corpora, sed & corda regit, & moderatur intimas omnium cogitationes, & affectiones, & nihil est tam reconditum, quò virga Regni ejus non penetret. *Magnus ergo Dominus*, & *walde laudabilis*, & *magnitudinis ejus non est finis*, quia & latitudo, & longitudo, & sublimitas, & profundum infinita sunt.

Daleth. v. 4. *Generatio*, & *generatio laudabit opera tua*, & *potentiam tuam prenuntiabunt*.

Ab essentiâ Dei magni Regis, quæ investigari non potest, transit ad opera ipsius mirabilia, ex quibus potentia ejus intelligi potest. Ego solus non sufficio laudare, sed omnes generationes *laudabunt* opera tua, quia nunquam deerunt, qui ea considerabunt, & inde potentiam tuam, quæ in illis relucet, assiduè prædicabunt.

He. ¶. 5. *Magnificentiam gloriæ sanctitatis tuæ loquentur, & mirabilia tua narrabunt.*

Dixit in genere de operibus Dei mirabilia, jam tria eorum genera distinguit, *gloriosa, terribilia, amabilia*. Ad prima pertinent Cæli superiores, Sol, Luna, Stellæ &c.; de his ait: omnes generationes laudabunt excellentiam glorioſi hujus operis, & mirabilia, quæ in eo sunt, ut varietas, multitudo, splendor &c. *Sanctitas hebraicè Majestas, Magnitudo.*

Vau. ¶. 6. *Et virtutem terribilium tuorum dicent, & magnitudinem tuam narrabunt.*

Dicit nunc de terribilibus: Robur, & potentiam terribilium flagellorum, quibus

quibus impios castigare solitus es, dicent, & ex iis *magnitudinem* potentiae tuae enarrabunt. Huc pertinet Diluvium, combustio Sodomae, plagae Aegyti, hiatus terrae ad absorbendos seditiosos; motus terrae, pestis, fulmina, eluvies aquarum, tempestates, & alia Dei flagella.

Zain. v. 7. *Memoriam abundantiam suavitatis tuae eructabunt, & justitia tua exultabunt.*

Tertium genus operum Dei, quod ad misericordiam pertinet, pluribus, & cum majori gratia explicat, quia adpios pertinet. Omnes generationes repletae abundantiam suavitatis, benignitatis, & misericordiae tuae, mandabunt posteritati memoriam tot beneficiorum; immo ipsi exultabunt ob fidelitatem, quam promissa beneficia praestitisti. Ut raseam innumeras consolationes, quas Deus in tot rebus creatis homini concedit; huc pertinent dona gratiae, Incarnatio, Passio, Resurrectio, Ascensio Christi, missio Spiritus S., Vocatio Gentium, aedificatio Ecclesiæ, justificatio impiorum, promissio Regni Cœlestis &c. Quæ

omnia cùm suavi meditatione quasi comeduntur, mirum non est, si ex tantâ plenitudine pii omnes eructent memoriam abundantiae suavitatis Dei.

Chet. ¶. 8. *Miserator, & misericors Dominus, patiens, & multum in servicos.*

Teth. ¶. 9. *Suavis Dominus univer-
sis, & miserationes ejus super omnia ope-
ra ejus.*

Ipse David jam primus eructat, & prædicat. *Misericors Dominus, quia tollit miseras, creando, gubernando, justificando, glorificando;* *Miserator, hebraicè, paterno affectu misericors;* *Patiens, perseveranter misericors, longanimis in tolerando impio, & exspectando ad patientiam:* & hæc misericordia non exigua, sed copiosissima est: nam suavis est omnibus, putà sanum palatum habentibus; imò misericordia ejus extenditur in omnia opera ejus, cùm nullum sit opus Dei, in quo misericordia ejus locum non habeat.

Jod. ¶. 10, *Confiteantur tibi Domine omnia opera tua, & Sancti tui benedictant tibi.*

Caph.

Caph. v. 11. Gloriam Regni tui dicent, & potentiam tuam loquentur.

Lamed. v. 12. Ut notam facians filii hominum potentiam tuam, & gloriam magnificentiae Regni tui.

Mem. v. 13. Regnum tuum, Regnum omnium saeculorum, & Dominatio sua in omni generatione, & generationem.

Cecinit opera Dei gloriosa, terribilia, & amabilia, & concludit: Laudent te opera tua, de quibus hactenus te laudavi: opera enim opificem laudant, si pulcra sint, & bona, qualia sunt opera Dei, ut nihil eis addi, vel minui possit. Dein transit ad qualitatem Regni. Opera tua, quae patent oculis omnium, generatio, & generatio laudabit, v. 4.; verum qualitatem Regni, de qua nunc dicam, cum eam Spiritus S. solis fidelibus tuis revelet, ideo Sancti tui benedicant tibi, laudent te: in quo? Gloriam Regni tui dicent, & potentiam tuam loquentur; ut faciant filios hominum intelligere, Regna sua terrena nihil esse, si comparentur ad Regnum Dei. Porro gloria, seu potentia Regni consistit in multitudine subditorum, & in mag-

H s nitudine

nitudine opum, unde subditi sustentari possunt. Est autem quadruplex differentia inter Regnum hominum, & Dei. Primo homines Reges habent subditos paucos, & sui Regni opes, h. e. tenuissimas; Dei subditi sunt omnes Angeli, omnes homines, omnes Dæmones; ejus opes sunt, quidquid in Cælo est, & terrâ, & mari. Secundo Reges homines sic dominantur subditis, ut etiam illis serviant, quia pendent ab illis, & sine illis nihil possunt; & pariter sic abundant opibus, ut semper egeant, nam exigunt vectigalia, tributa, & ut plurimum gravati sunt ære alieno: Deus dominatur omnibus, servit nemini, nullius operæ indigus: abundat opibus sine ullâ inopiâ, quia potest in momento producere ex nihilo multò plura, quam habeat. Tertio Reges homines gaudent honore, & dignitate suâ; sed anguntur assiduâ sollicitudine, & formidine, ut ideo fuerint, qui sponte imperium deposuerint: Deus nullâ premitur sollicitudine, nullo metu, sed cum tranquillitate, & securitate regnat. Quartò Reges homines brevi tempore
regnant:

regnant: *Regnum Dei Regnum omnium
seculorum &c.*

Nun. ¶ 14. *Fidelis Dominus in
omnibus verbis suis, & Sanctus in omni-
bus operibus suis.*

Transit ad virtutes Regias, quae in
Deo, & Christo homine perfectissimae
sunt. Prima virtus Regia est probitas
vitae, & praecipue veracitas in verbis.
Fidelis Dominus, verax, non mendax,
non decipiens, promissa omnia constan-
ter observans: & *Sanctus*, innocens,
impollutus, immaculatus in omni ope-
re suo.

Samech. ¶ 15. *Allevat Dominus
omnes, qui corruunt, & erigit omnes elisos.*

Altera virtus Regia, & Pastoralis est
misericordia: nam Regis, & Pastoris
idem est officium, regere subditos, ne
corruant, & erigere eos, qui forte cor-
ruerunt. Illud, *allevat*, in Hebræo est,
sustentat omnes, ne corruant, cum in
proximo sint, ut cadant. Licet plures
cadant, etiam spiritualiter, dicitur ta-
men Deus *omnes allevare, ne cadant, &
erigere elisos*, quia quicunque in tenta-
tione non cadunt, Deo juvante non ca-
dunt;

dunt; & qui ex casu resurgunt, Deo
erigente resurgunt; qui autem ex casu
non resurgunt, ex se habent, non ex
Deo, ut cadant, vel non resurgent;
& manet vera sententia Osee C. 13.:
*Perditio tua ex te Israel, tantummodo in
me auxilium tuum.*

Ain. ¶ 16. *Oculi omnium in te spe-
rant Domine, & tu das escam illorum in
tempore opportuno.*

Phe. ¶ 17. *Aperis tu manum tuam,
& imples omne animal benedictione.*

Tertia virtus Regia liberalitas est:
nec enim Rex variis artibus expilare
subditos debet, sed alere ut filios, sic
tamen, ut tempore suo comedant,
non totos dies in comedationibus con-
sumant. *Oculi omnium viventium ad te
respiciunt, sperantes à te cibum, ut in-
dè alantur, & vivant: & tu per creatu-
ras tibi subjectas, terram, Solem, plu-
vias, producis fructus copiosos in es-
cam omnium viventium. Illud, in tem-
pore opportuno varios hahet sensus, pri-
mò: dum tempus opportunum est, quia
non semper debent comedere: secundò,
quando necesse habes, dum esuris, eges:
tertiò,*

tertiò, dum æquum est: aliquando enim æquum est tolli, propter peccata immittendo sterilitates, & penuriam; sicut medici præscribunt cibi inediam, abstinentiam vini: quartò, quia non omnes fructus dat omni tempore, sed per temporum varietates varios fructus ex terrâ producit. Ut verò scias, primam causam omnium bonorum esse Dei liberalitatem, addit: *Aperis tu manum* &c. qui ¶ totus liberalitatem sonat: *Aperis manum*, non strictâ manu, sed largâ, apertâ, summâ liberalitate: *imples*, abundè satias: *Omne animal*, non solum hominem, sed omnia animalia: *benedictione*, h. e. abundantí refectione, quo sensu vocem accipit S. Paul. 2. Cor. 9. *Ut benedictionem, non ut avaritiam,* h. e. largam eleemosynam.

Tsadich. ¶ 18. *Justus Dominus in omnibus viis suis, & Sanctus in omnibus operibus suis.*

Quarta virtus Regia est justitia, quæ ad pacem, & quietem populi necessaria est. Dominus in omnibus actionibus suis externis, quibus quodammodo exit ab interno conclavi suo ad nos, iustissimus

stissimus est: tribuit enim omnibus,
quod illis debetur; & hoc idem repetit:
Et Sanctus in omnibus &c.

Coph. ¶. 19. *Propè est Dominus
omnibus invocantibus eum, omnibus invo-
cantibus eum in veritate.*

Quinta virtus Regia est facilem se
exhibere omnibus accendentibus, &
opem implorantibus. Hoc mirifice
præstat Deus noster, qui licet excelsior
Cælo sit, tamen appropinquat facile
omnibus invocantibus eum, nec ulli au-
dientiam negat. Illud, *in veritate*, in-
cludit omnes conditiones bonæ orationis:
ut fiat cum verâ fide, spe, fiduciâ, se-
rio animo, cum charitate, saltē in-
choatâ, cum affectu, & desiderio con-
sequendi, quod petitur; non voce tan-
tum, sed mente, & cum attentione.

Res. ¶. 20. *Voluntatem timentium
se faciet, & deprecationem eorum exaudiet,
& salvos faciet eos.*

Sexta virtus Regia est benignitas,
quâ non solùm facilè admittitur subdi-
tus ad audientiam; sed & benignè con-
ceditur, quod petitur, modò tale sit,
quod deceat Regem concedere. Auditâ
oratione

orationē præstabit, quod ipsi volunt. Addit, *timentium se: quia justum est,* ut Deus faciat voluntatem eorum, qui faciunt voluntatem ipsius, & timore sancto meruunt offendere Deum, & quidlibet potius amittere volunt, quam gratiam Dei.

Scin. v. 21. *Custodit Dominus omnes diligentes se, & omnes peccatores disperdet.*

Ultima virtus, sed maximè necessaria Regi est providentia, quâ protegit justos, ne à multitudine peccatorum opprimantur; & peccatores dissipat, ne justis noceant; aut non tantùm noceant, quantum vellent. Si Deus aliquando sinit justos ab impiis multa pati; tamen custodit eos, ne passio illis noceat, immo gratiâ suâ facit, ut multum prospicit. S.S. Martyres custodit, tribuendo illis constantiam in fide, patientiam in doloribus, ut animæ gloriam mox adipiscantur, & paulò post recipient corpus gloriosum. Quod ad peccatores pertinet, vel convertentur ad justitiam; & non erunt amplius peccatores; vel injusti permanebunt usque ad finem, & de-
trudentur

trudentur ad gehennam , ut ad iustos
nunquam possint appropinquare; unde
verum est: *Omnes peccatores disperdet.*

Thau. ¶. 22. *Laudationem Domini
loquetur os meum: & benedicat omnis ca-
ro nomini sancto ejus in s̄eculum, & in
s̄eculum s̄eculi.*

Concludit, jungens finem cum prin-
cipio: Propter hæc omnia, quæ dixi
de magnitudine Dei, de operibus ejus,
de perpetuitate Regni ejus, de virtuti-
bus Regiis, quæ in ipso perfectissimæ,
& absolutissimæ inveniuntur, *Laudatio-
nem ejus semper loquetur os meum;*
nec solùm ego laudare cupio, sed opto,
ut *omnis caro, omnis homo, omne,*
quod spirat, & vivit, nomen Domini
semper laudet.

PSALMUS CXLV.

Titulus: *Alleluja, Aggæi, & Zacha-
riæ.*

*Hæc verba, Aggæi, & Zachariæ,
queis carent soli codices Hebraici, à Septua-
ginta addita esse, docet S. Hilar. quia duo
illi Prophetæ prædixerunt renovationem
Jerusalem; & captivos consolabantur, &
horta-*

hortabantur ad redditum in patriam, & ad ipsam civitatem instaurandam.

Argumentum: hic Psalmus, uti & duo sequentes, Cælestem Jerusalem prædicant, & invitant ad iter ad eam suscipiendum: & quia nihil est, quod magis retardet peregrinos ab itinere, quam spes felicitatis terrenæ, quæ ab amicitiâ, & obsequio magnorum Principum dependet, hortatur gravissimis verbis, ut in nullo homine, quantumvis magno, spem ponamus, sed totam fiduciam nostram in Domino collocemus.

V. I. *Lauda anima mea Dominum: laudabo Dominum in vita mea; psallam Deo meo, quamdiu fuero.*

Incipit per dialogum. Peregrinus homo animadvertis carnem suam gemere in labore peregrinationis, hortatur animam suam, ut ipsa saltem, quæ spe beata esse cœpit, Deum laudet, & canendo reficiat totum hominem. *Lauda,* inquit homo ad animam suam, *anima meæ Dominum.* Respondet anima: *Laudabo &c. h. e. ut expónunt S. S. Hilar. & Aug.*, tunc verè laudabo, quando veram vitam vivam: nunc enim gemendum, & orandum potius, quam canendum, &

I lau-

Iaudandum: licet enim & nunc Neum laudemus, tamen non est haec simplex, & plena laudatio, sed admixta lacrimis, & precibus; tunc vero erit & sola, & perpetua, & jucundissima laudatio. *Psallam Deo &c.* idem repetit: cum ad vitam æternam pervenero, ab omnibus negotiis liber *Psallam Deo meo*, & sicut semper ero sine timore moriendi, ita semper psallam sine periculo deficiendi.

V. 2. Nolite confidere in Principibus, in filiis hominum, in quibus non est salus.

Videt S. Propheta, multos retardari ab itinere ad salutem, quia mirantur Præfecturas humanas, Principatus, Regna, quasi possent, qui ea possident, beatos facere, quos volunt; & miseratus cætitatem ipsorum, exclamat: Nolite confidere in Principibus, qui sunt filii hominum: quia salvare non possunt alios, nec ipsi salvi sunt, sed salvandi cum ceteris, si digni erunt.

V. 3. Exibit spiritus ejus, & revertetur in terram suam: in illa die peribunt omnes cogitationes eorum.

Jam probat, non esse salutem in filiis hominum. Nam velit, nolit, etiam in arce

arce munitissimā constitutus, & exercitu armato vallatus; licet etiam orbis terrarum Monarcha fuerit, exhibet spiritus ejus ex corpore, & corpus, recedente spiritu, *in terram*, unde sumptum est, revertetur; & tunc *peribunt omnes cogitationes eorum*, qui nempe in illo spem suam posuerunt; h. e. spes irritæ concident. Illud, *in terram suam revertetur*, nullo modo referri potest ad *spiritum*: nam in codice Hebræo *Spiritus* est generis fœminini, uti & *exhibit*, sed *revertetur* est generis masculini, uti & *corpus, caro*.

¶ 4. *Beatus ejus Deus Jacob, adjutor ejus: Spes ejus in Domino Deo ipsius, qui fecit Cælum, & terram, mare, & omnia quæ in eis sunt.*

Rejectâ vanâ confidentiâ in Principibus terrenis, docet, fiduciam ponendam esse in solo Deo vero, si quis ad veram, & æternam salutem pervenire desideret. *Beatus*, spē scil., & in via rectâ, ac securâ ad ipsam beatitudinem in re est, qui adjutorem, & protectorem in hac via habet *Deum Jacob*, h. e. verum *Deum*. Tum docēs, quis habeat *Deum*

adjutorem: cuius spes est in Domino Deo ipsius: nam fecit Cælum &c.; unde potentissimus est, & Dominus omnium rerum, & omnia ei subiecta sunt; ac per hoc, qui ab eo protegitur, nihil timere debet.

¶. 5. *Qui custodit veritatem in sæculum, facit iudicium injuriam patientibus, dat escam esurientibus.*

Nec solum omnipotens est, & potest protegere, ac juvare, sed etiam vult, quia justus, & misericors est. Quia justus est, semper observat promissa; promisit verò opem sperantibus in se. Item quia justus est, justè judicat causam, quam habent justi contra iniquos; & iniquos punit, justos coronat. Quia verò misericors est, per admirabiles vias providentiae suæ prospicit inopiæ spirituali, & corporali sperantium in se.

¶. 6. *Dominus solvit compeditos, Dominus illuminat cæcos.*

¶. 7. *Dominus erigit elisos, Dominus diligit justos.*

Quia non sufficit peregrinantibus ad patriam, protegi à latronibus, & almonia refici; sed necesse est habere pedes

des solutos, oculos illuminatos, & totum corpus sanum; unde ait: *Dominus solvit compeditos à compedibus concupiscentiæ malæ, mortificans paulatim omnes cupiditates: & quia concupiscentia excœcat, Dominus illuminat cœcos, præbens lumen sapientiæ, & prudentiæ interioris: & quia ex peccato non sola cupiditas, & cœcitas, sed & infirmitas orta est, & homo per peccatum similis illi factus est, qui descendens à Jerusalem in Jericho incidit in latrones, & spoliatus, ac vulneratus semi-vivus relictus est, ideo addit, erigit elisos.* Demum, *diligit justos, ut homo per gratiam sanatus, solutus, & illuminatus speret perseverantiam de Dei benignitate.*

¶. 8. *Dominus custodit advenas, pupillum, & viduam suscipiet, & vias peccatorum disperdet.*

Aliâ metaphorâ idem docet. Per *advenas* intellige peregrinos in terrâ alienâ, qui non sunt cives Babylonis, nec filii hujus sæculi. Pupilli sunt homines justi, destituti humano præsidio, qui Patrem non habent in terris, nec confidunt in ullâ re temporali. *Vidua dicitur Ecclesia,*

clesia, cùm virum suum non videat in terris, & multis injuriis, ac calamitatibus exposita fit. Hos omnes suscipiet Dominus in domum suam tempore suo: & tunc prosperitates Mundi, per quas ambulant peccatores, ut per vias latas, quæ ducunt ad perditionem, Deus in fine Mundi omnino disperdet, & destruet.

V. 9. Regnabit Dominus in sæcula, Deus tuus Sion in generationem, & generationem.

Demum peregrinatione finitâ, & viis peccatorum cum ipsis peccatoribus exterminatis, adveniet Regnum Christi semipernum. *Regnabit enim Dominus cum Sanctis suis in sæcula: regnabit, inquam, o S. Sion Deus tuus cum filiis suis in æternum.*

PSALMUS CXLVI.

Titulus: Alleluja.

Argumentum est exhortatio ad laudandum Deum, quia est dignissimus laude ob beneficentiam, sapientiam, potentiam, providentiam, justitiam, misericordiam.

V. 1. Laudate Dominum, quoniam bonus est Psalmus, Deo nostro sit jucunda, decoraque laudatio.

Hor-

Hortatur Propheta omnes: Laudate Dominum, quoniam bonum est vobis psallere Deo nostro; & efficite, ut illa laudatio sit Deo jucunda, ut revera erit, si sit etiam decora, h. e. qualis decet Dei Majestatem, pulcra, ornata virtutibus.

V. 2. Aedificans Jerusalem Dominus, dispersiones Israelis congregabit.

Indicat materiam laudis. Laudate Dominum, quia ipse ædificavit Jerusalem, & ad eam congregabit filios Israel in locis variis dispersos. Prævidit David, urbem, à Nabuchodonosor eversam, iterum sub Cyro, & Dario ædificandam, & captivitate solitâ, reddituros in patriam Judæos dispersos. Altiore sensu intellege hæc de ædificatione Ecclesiæ per Apostolorum prædicationem, & congre-gatione dispersorum filiorum Dei, Joan. 11. V. 51. & 52.: vel de supernâ Jerusalem, quæ quotidie ædificatur ut civitas, ascendentibus ad eam lapidibus vivis: ad quam congregandi sunt omnes peregrini, nunc dispersi per regiones Babyloniae.

V. 3. Qui sanat contritos corde, & al-ligat contritiones eorum.

Declarat, quomodo dispersos sit congregaturus. Judæi magnitudine calamitatum humiliati erant, & in se non amplius confidebant: hos ergo Deus sanavit, variis consolationibus illos erigendo, & laetificando; & alligavit contritiones eorum, dum per Cyri benevolentiam efficit, ut calamitas perfecta liberatione finiretur. Christus cor contritum, & humiliatum sanat à morbo peccatorum, more chirurgorum colligando vulnera. Sunt autem ex S. Aug. alligamenta peccatorum, Sacra menta vifilia, per quæ Deus peccata curare solet: & sicut curatis perfectè vulneribus, alligamenta tolluntur: sic in resurrectione corporum, curatis omnibus languoribus nostris, omnia Sacra menta cessabunt.

X. 4. *Qui numerat multitudinem stellarum, & omnibus eis nomina vocat.*

Secundò laudandus est Deus à sapientia. Licet Deo non sit difficile stellas numerare, cui non fuit difficile eas creare; tamen absolute magnum est, & multæ sapientiae multitudinem stellarum numerare; alias non diceret Deus Abrahæ Gen. 15.: *Numera stellas, si potes.* Illud,

¶

G omnibus ejus nomina vocat, significat notitiam distinctam naturæ, & proprietatum singularum stellarum.

V. 5. *Magnus Dominus noster, & magna virtus ejus, & sapientia ejus non est numerus.*

In stellis pariter apparet virtus, seu potentia Dei, quia vocando eas nominatim dedit illis esse, & moveri. Illud, *sapientia ejus non est numerus*, significat, non esse numerum earum rerum, quas Deus per sapientiam suam cognoscit.

V. 6. *Suscipiens mansuetos Dominus, humilians autem peccatores usque ad terram.*

Tertiò Deus laudandus à justitiâ, & misericordiâ. Deus verè pius, & misericors humiles, & mansuetos in protectionem suam suscipit, & exaltat usque ad Cælum: & ut justus Judex superbos peccatores, qui se, cum Satanâ, exaltant super sidera, humiliat, deprimit, ut humili jaceant, viles, & abjecti vivant.

V. 7. *Præcinite Deo in confessione, psallite Deo nostro in cithara.*

In medio Psalmi antequam perget ad laudem providentiae Dei, iterum hortatur: præmittite confessionem laudis ca-

I s nendo

nendo hymnum, & addite sonitum citharæ. Verba laudis Dei debet sequi sonitus operum bonorum.

V. 8. Qui operit Cælum nubibus, & parat terræ pluviam.

Laudanda est providentia Dei generalis, quâ suis temporibus cogit aërem in nubes, non ut Cælum obscureret, sed ut pluviam necessariam terræ tribuat, sine quâ nihil omnino in terrâ nasceretur. Alio sensu, Deus serenitatem prosperitatis subducit, ut ex tribulatione pluvia gratiæ Dei per patientiam, & humilitatem ad nos descendat.

V. 9. Qui producit in montibus fœnum, & herbam servitū hominum.

Declarat utilitatem pluviae. Non sufficit pluvia, & terra, nisi Deus producat, h. e. ope suâ cooperetur. Valles, & campi per aquas fluviorum irrigari possent; sed montes vel maximè pluviis indigent; alias omnino arescerent. Sensus V. est: fœnum agreste nasci in montibus in pastum jumentorum, herbam autem, quæ satione, & culturâ gignitur, produci in cibum hominum: vel, ut vult

S.

S. Chrysost., fœnum esse herbam jumentorum, ut jumenta homini serviant.

¶. 10. *Qui dat jumentis escam ipsorum, & pullis corvorum invocantibus eum.*

Pergit explicare providentiam Dei erga bestias, & volatilia, ut discat homo multo magis confidere in Dei confidentia. Illud, *invocantibus*, significat, dum crociant quærentes cibum, non quod Deum cognoscant, sed quia Deus est, qui providentiâ suâ illis cibum desiderantibus procurat, præsertim cum pulli nondum novarent cibum quærere.

¶. 11. *Non in fortitudine equi voluntatem habebit, nec in tibiis viri beneplacitum erit ei.*

¶. 12. *Beneplacitum est Domino super timentes eum, & in eis, qui sperant super misericordia ejus.*

Quia dixerat, Deum prvidere *pullis corvorum invocantibus eum*, concludit, Deo non esse gratos superbos. Non amat Deus fortitudinem equi, quatenus de ea superbunt homines: nec complacet sibi Deus in tibiis robustis hominum, quatenus in illis ipsi confidunt, ut Dei ope sibi egere non videantur ad evadenda

denda pericula: sed *beneplacitum est Deo*
super humiles, & trementes ad manda-
ta Dei, & qui non in suis viribus, sed
in Dei misericordia totam spem suam
ponunt.

PSALMUS CXLVII.

Titulus, & Argumentum: *Alleluja.*

Hortatur populum Dei ad ipsum lau-
dandum ob multa beneficia in ipsum collata.
Quæ hic dicuntur, conveniunt terrenæ Je-
rusolymæ; perfectius Ecclesiæ Christianæ;
perfectissimè Cœlesti Jerusalem.

V. I. *Lauda Jerusalem Dominum:*
lauda Deum tuum Sion.

Sion pars erat urbis nobilior, ubi
 templum Domini ædificatum erat; sed
 & sumitur pro totâ urbe. Cùm in Cœ-
 lesti Jerusalem nullus sit egens, nullus
 miser, nec proinde aliis curis opus sit,
 urbs illa & totâ, & semper vacare potest
 laudibus Dei; rectè igitur illi dicitur:
Lauda Dominum, quæ ab omni alio ne-
gotio libera es; lauda Deum tuum, quia
præ omni aliâ civitate beneficiis Domini
fueris, & præstantiam ejus intueris.
Eccle-

Ecclesia, quæ peregrinatur in terris, laudare quidem Dominum debet, sed nec tota, nec semper id facere potest, cùm sœpe sollicita esse, & circa plurima turbari necesse habeat.

¶. 2. *Quoniam confortavit seras portarum tuarum, benedixit filiis tuis in te.*

Ratio, cur debeat Jerusalem laudare Deum, est, quia dedit illi securitatem, & abundantiam, in quibus summa bonorum omnium consistit. Deus confortavit seras portarum Jerusalem, ut nullâ vi expugnari possiat, &, qui intus sunt, securi sint, quia nihil mali intrabit, nihil boni exhibet: nullus admittetur inimicus, nullus excludetur amicus: atque in hanc tam munitam civitatem benedictio divina copiam omnium bonorum intulit. Sed hæc duo perfectè conveniunt cælesti Jerusalem, ubi securitas est æternitas, & benedictio est fruitio summi boni. Ecclesiæ peregrinanti in terris ista suo modo convenient, sed non omnibus modis: nam *portæ inferi non prævalebunt adversus eam*, nec desunt ei bona plura: sed interim tamen multi in eam intrant mali, multi ex eâ deficiunt boni:

paleas

paleas cum tritico, pisces malos cum bonis, hædos cum agnis admixtos habet. Demum convenient illa terrenæ Jerusaleni, sed valde imperfecte: nam in montibus sita, & montes in circuitu habens, satiis munita videri poterat; & plena populo, atque opibus aliquando fuit: sed ramen non semel eversa, & succensa satiis ostendit, non de illâ potissimum intelligendum esse, quod hic dicitur: *Confortavit seras portarum tuarum.*

X. 3. *Qui posuit fines tuos pacem: & adipe frumenti satiat te.*

Nec solum munitissima est civitas S. Jerusalem, sed etiam immunis à bellorum periculis, unde & nomen habet *Jerusalem*, h. e. *visio pacis*. *Qui posuit*, diffudit pacem per universam regionem tuam usque ad ultimos ejus fines. Nee solum hæc civitas abundat cōpiâ bonorum, sed habet bona optima, & ipsam medullam bonorum. Illud, *adipe frumenti*, significat excellentiam ciborum, & illud, *satiat te*, ubertatem maximam. In Cælo pax summa erit Sanctorum inter se, & cum Deo: cibus animæ erit veritas, & sapientia, non in figuris, & ænigmati-

matibus, nec sub cōrtice Sacramēti,
vel Scripturarum, sed in se ipsis; & ita
satiabuntur, ut non esuriant, neque si-
tiant in æternū. In Ecclesiā peregri-
nante habemus pacem ad Deum, sed si-
mul in Mundo pressuram sustinemus.
Cām omnibus, quantum in nobis est,
pacem habere curamus, sed versamur in
medio eorum, qui odērunt pacem: pro-
inde foris pugnæ, intus timores nunquam
desunt. Adipe frumenti pascimur, sed
non sinē variis integumentis: Verbum
Dei habemus, sed in carne, & ipsam car-
nem Verbi verē manducamus, sed sub
cortice Sacramēti. Aquas sapientiæ bi-
bimus, sed ex stillicidio Scripturarum;
& adeò non satiamur his bonis, ut nostra
beatitudo interim sit esurire, & sitiare.
Multò minus ista conveniebant terrenæ
Jerusalēm, antiquæ Synagogæ Judæo-
rum, quibus omnia contingebant in fi-
guris.

V. 4. *Qui emittit eloquium suum terræ,
velociter currit sermo ejus.*

Hortatus est Propheta S. civitatēm,
ut Deum laudet pro beneficiis sibi præ-
statis; nunc hortatur, ut laudes etiam
pro

pro beneficiis præstitis aliis nationibus, ex quibus cognoscet, quanto majora dona sibi, quam aliis concederit Deus. Laudate Deum, cuius præcepta, & decreta celerrimè deferuntur ad omnes res creatas, mox penetrant omnia, & executioni mandantur. Significat ordinem providentiae Divinæ, qui se ad omnia extendit, idque summâ velocitate, quasi velocissimè accurrisset: nec enim necesse est sermonem Dei propriè moveri, cùm ubique præsens sit.

V. 5. Qui dat nivem, sicut lanam, nebulam sicut cinerem spargit.

V. 6. Mittit crystallum suam sicut buccellas, ante faciem frigoris ejus quis sustinebit?

Ab universali providentiâ descendit ad effectum unum particularem, frigus scilicet, & calorem aeris, qui etsi sensu percipitur, & omnibus notissimus est, in eo tamen apparet mirabilis potentia, & sapientia Dei, quam etiam meritò laudare debeant ii, qui in supernâ Jerusalēm extra, vel supra mutationes temporum degunt. Aliquando tanta nivium, pruinæ, & glaciei copia repente existit,

ut

ut laus, & flumina, & ipsa maria con-
gelentur, adeò ut plausta bene onusta
super lacus, & flumina ducantur. Et
cùm ea glacies ferreis ligonibus vix di-
rumpi queat; Deus tamen, cùm ipsi pla-
cer, ventum calidum repente ex thesa-
ris suis advocat, & dicto citius solvitur
glacies omnium fluminum, & lacuum,
& marium simul, & ubique ex rectis
domorum, ex montibus, & collibus
desantuunt aquæ. Ita ferè in momento
Deus rigorem frigoris cum caloris sua-
vitatem commutat. Nunc verba explice-
mus: *Qui dat nivem, sicut lanam:* ali-
quando ita tenuiter ningit, ut frustula
nivis videantur similia atomis; aliquan-
do ita granditer ningit, ut frusta ni-
vium non tantum candore, & levitate,
sed etiam magnitudine lanarum floccos
imitentur. *Nebulam,* seu pruinam *sicut*
cinerem spargit, h. e. tantâ densitate prui-
nam caliginosam diffundit, ut cinerem
spargere videatur. Mittit Chrystallum.
hebraicè glaciem &c., h. e. jussu suo cau-
sa est, ut glacies frigidissima in terrâ exi-
stat, cuius fragmenta habent figuram
fragmentorum panis. *Dignum admira-*

K
tur

tur frigoris vehementiam: ante faciem, ad præsentiam tanti frigoris quis sustinere poterit? quis non congelabitur, & peribit?

¶. 7. Emittet verbum suum, & liquefaciet ea: flabit spiritus ejus, & fluent aquæ.

Nunc describit, quanta facilitate Deus faciat nivem, pruinam, & glaciem recedere. Jubebit Deus, & mox liquefcet nix, pruina, & glacies, & continuò frigus remittetur. Subjungit modum, quo id faciat Deus: jubente Deo, surget ventus australis, perflabit undique aerem, & nix, pruina, & glacies solventur in aquas.

¶. 8. Qui annuntiat verbum suum Jacob, justias, & judicia sua Israel.

¶. 9. Non fecit taliter omni nationi, & judicia sua non manifestavit eis.

Concludit, ostendens, quantum intersit inter providentiam Dei erga populum suum, & alias nationes: has docuit per effecta naturæ, ut ex rebus creatis agnoscerent Creatorem. Sed populum suum Jacob ipse docuit per Prophetas suos, Moysen, & alios; Deus Moysi legem dedit, ut eam traderet populo.

pulo suo Israel; & ex hoc intelliges,
quia non fecit taliter omni nationi, quia
tibi soli, non aliis leges suas manifesta-
vit. Hæc magis conveniunt Ecclesiæ,
quæ recepit ipsum Verbum incarnatum
per Apostolorum prædicationem, &
multò sublimiorem legem, justicias, &
judicia didicit: sed perfectissimè conve-
niunt Cælesti Jerusalem, cui Deus ipse
coram annuntiat Verbum suum, & in
ipso Verbo vident omnes habitatores
Jerusalem judicia Dei, ordinem, ac dispo-
sitionem, & rationes providentiae Divi-
tiae, quæ nobis sunt abyssus multa.

PSALMUS CXLVIII.

Titulus, & Argumentum: *Alleluia.*

Tres ultimi Psalmi hunc titulam ha-
bent; & quidem Psalmus hic invitat omnes
res creatas quasi ad chorum, ut suo modo
omnes canant: Sequens invitat homines,
ut propter plura, & majora beneficia ac-
cepta Deum laudent: Ultimus præterea
mandat hominibus, ut etiam Deum lau-
dent per omnia instrumenta musicæ.

v. i. *Laudate Dominum de Cælis:*
laudate eum in Excelsis;

*V. 2. Laudate eum omnes Angeli ejus,
laudate eum omnes virtutes ejus.*

Primo loco invitantur Angeli. Illud, *laudate*, non est imperantis, nec propriè exhortantis, quasi Angeli desint officio suo; sed est invitantis per affectum complacentis, & optantis, E. g. *Utinam omnes res creatæ Creatorem laudent!* & vos Angeli, qui primi estis in ordine rerum creatarum, *pergit*, ut facitis, de habitaculo vestro Cælesti laudare Dominum. *V. 2.* Idem repetit; ubi per *Virtutes*, hebraicè exercitus, intellige militiam Cælestem, seu eosdem Angelos.

V. 3. Laudate eum Sol, & Luna, laudate eum omnes Stellæ, & Lunen.

V. 4. Laudate eum Cæli Cælorum, & Aquæ omnes quæ super Cælos sunt, laudent Nomen Domini.

Post Angelos invitat omnes partes Mundi Superioris, Solem, Lunam &c. quæ Deum laudant magnitudine, velocitate, efficacitate, splendore, pulchritudine admirabili, quomodo omne opus egregium, opificem laudare dicitur. Per Cælos Cælorum intellige Cælos superiores, quibus subjecti sunt Cæli inferiores,

in

in quibus nubes concrescunt, aves volitant.

v. 5. *Quia ipse dixit, & facta sunt, ipse mandavit, & creata sunt.*

v. 6. *Statuit ea in æternum, & in sæculum sæculi: præceptum posuit, & non præteribit.*

Hæc est ratio, cur omnia, hactenus nominata Deum laudare debeant: *Quia ipse dixit, fiat lux, & facta est lux &c.* Ipse mandavit rei non existenti, ut existeret, & mox obediens cœpit existere, quæ antea nihil erat. *Statuit ea &c., constituit, ut semper maneant.* *Præceptum dedit Angelis, ut semper Deum laudent;* Soli, & Lunæ, & Stellis, ut circumneundo, & illustrando, serviant humano generi, quod præceptum non erit irritum.

v. 7. *Laudate Dominum de terra, dracones, & omnes abyssi.*

Transit ad Mundum inferiorem, ubi sunt creaturæ corruptibles. *Laudate Dominum omnia, quæ estis in terrâ, vel pertinetis ad terram.* Tum incipit particularia nominare, & primò meminit aquarum, & piscium: nam per dracones intelliguntur hoc loco magni pisces, vide

Ps. 103. v. 29.; & per abyssos aquarum profunda.

v. 8. Ignis, grando, nix, glacies, spiritus procellarum, quæ faciunt verbum ejus.

Ab aquarum abysslo transit ad aerem, ubi inveniuntur ignes, h. e. fulgura, fulmina, coruscationes, grando &c. Spiritus procellarum, h. e. venti vehementes, qui tempestates excitant, & in gentes pluvias secum ferunt: quæ omnia obediunt præcepto ejus, dum iis scil. uritur, ut instrumentis ad malos puniendos, vel bonos admonendos.

v. 9. Montes, & omnes colles, ligna fructifera, & omnes Cedri.

v. 10. Bestiæ, & universa pecora, serpentes, & volucres pennatae.

Ex aere redit in terram: nominat primum partes eminentiores, Montes, Colles, ex quibus subintelliguntur campi patentes, & valles: Deinde nominat, ligna fructifera, & infrafructifera, ut Cedri, quæ eamen ad ædificia domorum, & navium requiruntur. Tum subdit orationem ad omnia animantia, non ut ipsa Deum laudent, sed homines considerantes utilitatem, quæ ex eis capitur, eique debitas gratias

gratias agant. Animantia, etiam quæ nobis terrorem incutiunt, ut leones, serpentes; vel molestiam, ut culices, musicæ, homini utilia sunt: nam erudiunt nos ad humilitatem, dum in memoriam revocant inobedientiam, & superbiam parentum primorum, nobis hæreditariam, ob quam imperium in animantia magnâ ex parte perdidimus.

X. 11. *Reges terræ, & omnes populi: Principes, & omnes Judices terræ.*

X. 12. *Juvenes, & Virgines: Senes cum junioribus, laudent nomen Domini, quia exaltatum est nomen ejus solius.*

Demum genus humanum citat ad laudes Dei, atque ut neminem omittat, enumerat tres hominum differentias. primum potestatis: *Reges, & populi*, h. e. qui imperant, & qui parent; & quia, qui imperant, non sunt ejusdem ordinis, sed alii aliis præsunt, addit: *Principes*, supremi videlicet, & *omnes judices*, qui à Principibus autoritatem habetis. Secundò sexus: *Juvenes, & Virgines*, h. e. viri, & foeminae. Tertiò ætatis: *Senes cum junioribus*. Omnes igitur laudent nomen Domini, quia non est aliud nomen verè

sublime, & altum, & omni laude dignum, nisi Dei nomen. Res enim creatæ, quævis magnæ, si ad magnitudinem Dei comparentur, nihil sunt, & quidquid magnitudinis, excellentiæ habent, ab illo habent, qui solus altissimus jure nominatur, & est.

¶. 13. *Confessio ejus super Cælum, & Terram, & exaltavit cornu populi sui.*

Ideo exaltatum est Nomen ejus solius, quia omnia, quæ in Cælo, & quæ in terra sunt, confitentur laudes ejus, ita plenæ sunt Cæli, & terra gloriæ ejus: & ipse per se solus sublimis, & excelsus, exaltavit potentiam, & gloriam populi sui Israel, eligendo eum in populum peculiarem, dando legem proprio digito scriptam, singulari providentiâ regendo.

¶. 14. *Hymnus omnibus Sanctis ejus, Filiis Israel, populo appropinquanti sibi.*

Conclusio: igitur Hymnus Deo canendus præcipue convenit omnibus Deo dicatis, & consecratis, filiis Israel neimpe non tanta illis carnalibus (hi enim cum durâ cervice essent, Deo non propinquabant, ut hic rectè monet S. Aug.) quam Spiritualibus, qui populus est præter ceteros omnes Deo ipsi propinquans
verâ

verà cognitione, & fide, & vero cultu, &
adoratione, verà filiali fiducia, & dilectione

PSALMUS CXLIX.

Titulus: *Alleluja.*

Argumentum est obligatio, quā tene-
tur populus Dei laudare Dominum suum
præter ceteras gentes, ob gloriam sempiter-
nam sibi promissam, & ad quam finito præ-
senti exilio sine dubitatione perveniet.

X. i. *Cantate Domino canticum no-
vum, laus ejus in Ecclesia Sanctorum.*

Hi tres ultimi Psalmini inter se conne-
ctuntur, & unus continuatur cuin alio;
& ideo forte in officio Canonico ad lau-
des, quasi unus Psalmus, concinuntur.
Ait igitur: O vos sancti, qui populus estis
Deo propinquans, *Cantate Domino can-
ticum novum*, h. e. ceteræ creaturæ can-
tant canticum ratione creationis, quod est
canticum vetus; vos autem cantate ratio-
ne renovationis, justificationis, glorifica-
tionis, quod est canticum novum, super
novâ materiâ, à novis hominibus decan-
tandum. Cantate autem, quia decet, ut
laus Dei potissimum audiatur in congre-
gatione Sanctorum.

X. 2. *Lætetur Israel in eo, qui fecit eum, & filii Sion exultent in Rege suo.*

Canticum novum magnam habet lætitiam, quia annuntiat beneficia perfectæ felicitatis, & quia ardentiſſimo amore procedit. Igitur Israel, populus Dei electus, qui cantat canticum novum, lætetur cantando in eo, seu conditore suo, qui non solum creavit naturam, sed etiam donavit gratiam, & sic fecit, non solum ut esset, sed ut esset Israel. *Et filii &c., idem repetit.*

X. 3. *Laudent nomen ejus in choro, in tympano, & psalterio psallant ei.*

Nec solum cantent canticum cum lætitia, & exultatione, sed adjungant instrumenta musica, h. e. non solum ore, sed & opere, non lingua tantum, sed etiam manu, h. e. vitâ, & moribus cantent. Ait igitur: *Laudent eum in choro, vocibus consonis simul concinantes, in tympano, & psalterio, manibus psallentes lætitiae sonitum edant.*

X. 4. *Quia beneplacitum est Dominino in populo suo, & exaltavit mansuetos in salutem.*

Hæc est ratio cantici novi, quia complacuit sibi Dominus in populo suo, h. e. amavit

amavit eum ab æterno ex misericordia benignitate suâ; & beneplacitum hoc re ipsâ implebit, quia populum suum humilem, & mitem exaltabit usque ad summam excellentiam, quæ est æterna salus. Porro istud beneplacitum Dei est fundamentum, & prima radix omnium bonorum nostrorum: nam ideo prædestinavit, ideo vocavit, ideo justificavit, ideo glorificavit, quia sibi complacuit in populo suo.

X. 5. *Exultabunt sancti in gloria, lætabuntur in cubilibus suis.*

Describit futuram gloriam electorum, ob quam toto corde cantare debent canticum novum. *Exultabunt sancti in gloria illâ cœlesti, & simul lætabuntur in cubilibus suis, in loco illo summæ quietis.* Erunt itaque in cubilibus, ut quiescant à laboribus, non ut dormiant, nec ut requiescant ab actione laudationis.

X. 6. *Exaltationes Dei in gutture eorum, & gladii ancipites in manibus eorum.*

In illâ supernâ felicitate adeò non sunt otiosi sancti, ut & ore cantent, & manibus gladios vibrent. Per gladios intellige potestatem judiciariam, quâ Sancti omnes in die novissimo ferient persecutores suos.

X. 7.

V. 7. *Ad faciendam vindictam in nationibus, increpationes in populis.*

Ad hoc utentur Sancti gladiis bis acutis, ut in die judicii vindictam sumant de hostibus suis, & eos increpent, atque eis exprobrent iniquitates suas: *Stabunt enim iunc justi in magnâ constantiâ adversus eos, qui se angustiaverunt.* Sap. 5.

V. 8. *Ad alligandos Reges eorum in compedibus, & nobiles eorum in manicis ferreis.*

Tunc Sancti potestate suâ judiciariâ & ferient condemnando, &, per ministros suos sententiam exequendo, alligabunt Reges gentium in compedibus & Princes terræ in manicis ferreis, dum cum Christo in extremo die judicii sententiam ferent adversus Antiochos, Herodes, Nerones, Diocletianos, & ceteros Principes infideles, ac dicent: *ligatis manibus, & pedibus projiciantur in tenebras exteriores,* Matth. 22.

V. 9. *Ut faciant in eis judicium conscriptum; gloria hæc est omnibus Sanctis ejus.*

Hic aperte declarat Propheta, quorsum dixit, *ad faciendam vindictam &c.:* ut Sancti, qui in terris injustè judicati sunt,

funt, faciant justum *judicium*, jam olim
conscriptum, decreum, firmatum, ut
mutari non possit. *Gloria hæc* sedendi
cum Christo in nubibus, & judicandi
Mundum, & Principes ejus, erit *omnibus*
Sanctis ejus. Licet enim Beda dicat, duos
ordines futuros electorum, unum judi-
cantium cum Christo, alterum misericor-
diter judicandorum; tamen illi, qui mi-
sericorditer judicati fuerint, postea etiam
cum Christo judicabunt persecutores
suos, ut constat ex 1. Cor. 15.

PSALMUS CL.

Titulus: *Alleluja.*

Argumentum: *Invitatur populus Dei ad laudes Domini in summo Cælo habitantis, cum omnibus musicis instrumentis, ut hoc modo demonstret ardentissimum affectum suum.*

V. 1. *Laudate Dominum in Sanctis ejus, laudate eum in firmamento virtutis ejus.*

O vos electi, & Sancti laudate Domi-
num in Sanctis ejus, hebraicè, in Sanctua-
rio cælesti habitantem. **T**um idem re-
petit.

petit. Cælum etiam dicitur *firmamentum virtutis* seu fortissimum palatum, & thronus altissimus Dei. Quia tamen sanctuarium Dei supremum sunt animæ iustorum; imò ipsi Sancti sunt templum Dei; ideo potest etiam cum Patribus simpliciter hic v. exponi de Sanctis hominibus, quatenus in eis Deus habitat, ut in præcipuo sanctuario suo.

v. 2. *Laudate eum in virtutibus ejus, laudate eum secundum multitudinem magnitudinis ejus.*

Docet Deum laudandum, non quia in Cælo simpliciter habitat; sed quia in eo habitat, ut omnipotens Imperator, & Dominus omnium rerum: nam per *virtutes* hoc loco non intelliguntur *virtutes morales*, nec exercitus Angelorum, sed *robur*, & *potentia*; & per magnitudinis multitudinem intelligitur excellens magnitudo: Sic *multitudo dulcedinis*, h. e. *excellencia dulcedinis*. Ergo ait, *laudate eum ob magnas vires, & magnum robur ejus: laudate eum*, quia eximia est magnitudo ejus, cùm sit absolute, & simpliciter magnus. De magnitudine Dei vide fūsus. Ps. 144. v. 3.

v. 3.

V. 3. *Laudate eum in sono tubæ, laudate eum in psalterio, & cithara.*

Tria sunt instrumentorum Musico-
rum genera, vox, flatus, & pulsus: om-
nium meminit; hic nominantur tubæ,
quæ flatu sonitum reddunt; psalterium,
& cithara, quæ pulsu chordarum reso-
nant. Psalterium enim esse instrumen-
tum decem chordarum, non semel legi-
tur in Psalmis:

V. 4. *Laudate eum in tympano, & cho-
re, laudate eum in chordis, & organo.*

Hic numerantur omnia genera: nam
tympanum, & chordæ pulsantur; chorus
vel est instrumentum musicum nobis
incognitum, vel concentus vocum hu-
manarum: *Organum inflatur: lieet enim*
ignoratum sit, quid *organum* hoc loco signi-
ficet; tamen probabiliter dici potest, esse
instrumentum plurium tibiarum simul
conjunctionarum, ad cujus postea imitatio-
nem facta sunt ea, quæ nos *Organa* vo-
camus.

V. 5. *Laudate eum in cymbalis bene so-
nantibus, laudate eum in cymbalis jubila-
tionis: omnis spiritus laudes Dominum.*


Cym-

Cymbala quauntur, & tintinnitum redunt. Dicuntur Cymbala jubilationis, quia magnum, latumque sonitum redunt, quales campanae apud Christianos. Illud, *omnis Spiritus laudet Dominum*, quatuor habet explicationes: omissis ceteris, quarta est, ut per *Spiritum* intelligamus generatim omnia, quæ vivunt, sive spirituali vitâ, ut Angelos; sive animali, ut bestias; sive utrâque, ut homines; sive metaphoricâ vitâ, ut cetera omnia, quæ licet in se inanima sunt, tamen *Deo vivere* dicuntur, quia ita serviant, & obediunt Deo, ac si viverent, & sentirent, & Creatoris mandata perciperent; unde est illud Ecclesiasticum: *Regem, cui omnia vivunt.* Atque hic sit finis Commentarii.

O. A. M. D. G.







Y
BELIARMI
IN
PSALMOS

Th
3172